

دائرة الخوف

## الطبعة الأولى

١٤٤٤هـ - ٢٠٢٣م

اسم الرواية:	دائرة الخوف
اسم المؤلف:	بودا إبراهيم
التدقيق اللغوي:	د. ياسر عوض
تصميم الغلاف:	محمد دريالة
الإخراج الداخلي:	خالد محمود
رقم الإيداع:	٢٣٩١٢ / ٢٠٢٢
الترقيم الدولي:	٩٧٨-٩٧٧-٨٦٣٧٢-٦-٧



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار  
للنشر والتوزيع  
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

# دائرة الخوف

بودا إبراهيم





## هَدَاة

"أبويا"

أكثر إنسان يحبه في الدنيا، يمكن أكون مش قادر أوصف مدى حبي ليه إلا إن حبي ليه مَلُوش حدود، ليه الفضل في أي حاجة وصلت ليها في حياتي بعد ربنا، شكرًا على وقفك جنبي، شكرًا على عطاءك الي ما بيخلصش، ومهما اتكلمت عنك عمري ما هقدر أوفيك حقك يا أعظم إنسان في الكون.

"أمي"

أكثر إنسانة بتدافع عني في الدنيا، دعواتك ووجودك في حياتي أكبر نعمة وبحمد ربنا عليها، شكرًا على كل حاجة يا أحن إنسانة في الدنيا.

"أختي"

المشاكسة ربنا ما يحرمينش منك ويخليكي ليا وتفضلي مشاكسة كده طول عمرك.



## الإسكندرية - ٢٠١٧

أول مرة أكون هنا لوحدي، معرفش ليه سافرت لوحدي، بس هي حاجة جوايا بتقول لي روح إسكندرية في التوقيت ده وفي القطر ده ومن غير الناس اللي حواليك، الغريب إنه محصلش أي حاجة جديدة، لكن اكتشفت حاجة مهمة على الأقل بالنسبالي؛ وهي " شعور اللا شيء "، شعور مريب وغريب، كنت متوقع أعيش لحظات كتير جدا من الماضي، أشتاق لقعدة الصحاب أشتاق لأول مرة في كل حاجة حصلت هنا، إنما الواقع مفيش أي حاجة من دي حصلت، ما بفكرش ما بحاولش أفكر من الأساس، عقلي فاضي ولأول مرة ساكت، خُوفت من الشعور اللي جوايا، صعب جدا تكون شخص عقلك وتفكيرك شغالين طول الوقت وفجأة تحس جواك شعور باللا شيء، وحياتك تقف عند اللحظة دي، ساعتها تتحس بإن في حاجة غلط، كان جوايا أسئلة كتير؛ إيه اللي بيحصل؟ أنا جيت هنا ليه؟ هو أنا بهرب من حاجة؟ أنا خايف ليه من الإحساس ده؟ هي دي النهاية؟

الحقيقة مكش عندي أي إجابة لأي سؤال من أسألتي والغريب أكثر إنني محاولتش ألاقى إجابة أساساً ومعرّش ليه محاولتش.

تعبت من المشي وقفت تاكسي، كان راجل كبير تقريبا في الستينات أو أواخر الخمسينات ركبت معاه.

- محطة القطر بعد إذنك يا حاج، أنا لسه واصل من ٥ ساعات، معقول قررت أرجع " هو إيه اللي بيحصل ده؟ ".

- بتقول حاجة يابني؟

- ها.. لا يا حاج.

- شكلك مش من إسكندرية هو أنت تايه؟

- أنا من القاهرة، مش تايه، بس مستغرب تصرفاتي، بنفذهها من غير ما أفكر فيها.

- هو ده اللي مزعلك؟

- مش زعلان ولا فرحان! حاسس بالفراغ وإنني فاضي ومش محتاج أي حاجة، الحياة واقفة تماما، ما بحاولش أدور على تفسير للي بيحصل بس مرتاح.

- الراحة ما بيحسش بيها غير واحد عمل كل اللي عليه وتعب



واجتهد ورضي باللي ربنا كتبوهله، والراحة دي هدية ربنا ليه، قول الحمد لله وما تتعيش نفسك بالتفكير.

- الحمد لله.

وصلت، وقفت على باب المحطة بتأمل الناس والمكان والزحمة وبسأل نفسي سؤال واحد:  
 - "أنا هعمل إيه؟".

- هتركب قطر القاهرة وهترجع.

في اللحظة دي حسيت إن الحياة رجعت لطبيعتها وإن عقلي فاق من حالة الإغماء الي كان فيها. قطعت تذكرة وركبت القطر وبدأت أفكر وأحاول ألاقي تفسير مقنع لي حصل وإجابات للأسئلة الي جوايا لكن فشلت في إني أجابوب عليها.

مفيش أي سبب واضح يدفعني إني آخذ قرار بالسفر في التوقيت ده ولوحدي، يمكن كلام السواق هو الإجابة الوحيدة المقنعة على أسئلي؛ "الراحة". بطلت أفكر وبصيت من الشباك على المحطة والناس والقطر واقف في المحطة مستني يحمل أكبر عدد من الركاب، حسيت بحركة في الكرسي الي جنبي لقيت وشي لقيت بنت لابسة فستان أسود طويل واقفة في الممر بتحاول تحط

الشنطة في الرف الي فوق الكراسي، ما كنتش شايف وشها بس  
كان واضح إنها بتجاهد عشان تحط الشنطة على الرف.

- أساعدك؟

- ده لو مش هتعب حضرتك.

- لا ولا تعب ولا حاجة.

- كنت فاكدة إنك هتعرفني من صوتي، أنا شوفتك وأنت داخل  
من باب القطر.

- مين؟ يا نهار أبيض! مش معقول! ده بجد؟ إيه الصدفة دي؟

- ده بجد أيوه. عامل إيه يابني؟

- تمام! أنتي ازيك؟ بقالنا قد إيه ما تقابلناش؟ سنتين؟ ثلاثة؟

- لا سبعة. احنا بقالنا سبع سنين ما تقابلناش. تخيل؟

- ياااه، بس أنتي، أنتي اتغيرتي قوي، للأحسن، للأحسن قوي  
بصراحة يعني!

- وأنت ما تغيرتش، لسه شكلك مش باين عليه سنك خالص.

- بقيتي تسافري لوحذك وفي القطر من غير خوف!

- كبرت! أو ما بقتش الطفلة الجبانة الي كانت موجودة زمان، أو لسه طفلة بس جريئة، مش عارفة، بس أعتقد خسارة الحاجات الي كنت بتخاف تخسرهما ممكن تقتل جواك أي خوف، أو تعلّمك إنك متخافش من حاجة أو على حاجة، قرار إنك تخوض التجربة لوحدك بدون ما تحاول تسند على حد قرار مش سهل خالص، الخروج للحياة فجأة مكنش سهل عليا، فاهمني؟

- فاهمك، وفاكر كمان إنك كتي بتخافي من المواجهة لأن فيها احتمال للخسارة.

- ذاكرتك قوية جدا، ما شاء الله، الخوف شعور قاتل بيضيع علينا لحظات كثير حلوة، وأوقات بيضيع حقنا بسبب إننا بنخاف نتكلم فنخسر الشخص الي قدامنا، ويخلينا نقبل بوضع عمرنا ما كنا مرتاحين فيه.

- عندك حق، بس في أوقات لازم نخاف فيها لأننا لو نخوفناش وقتها هنكون بنغامر مغامرة مش محسوبة ونخسر حاجة احنا مش مستعدين لخسارتها.

- جايز، بس مش غريبة إنك كنت في إسكندرية لوحدك! أنا فاكرة لما كنت بتقول لي إن إسكندرية ما ينفعش تكون من غير

الصحاب واللمة! هي إسكندرية اتغيرت؟

- لا إسكندرية متغيرتش، بس تقدري تقولي إن أنا في هُذنة.

- هُذنة! أنت سببت الشغل؟

- مش بالظبط، خدت أجازة مفتوحة، (أدور) فيها على شوية إجابات.

- لسه زي ما أنت من أيام الجامعة، بتعزل الناس عشان تحاول توصل للي أنت عايزه، عارف أنا كنت بستغربك جدا في البداية، كنت على طول شايفاك انطوائي ما بتكلمش كثير، لكن لما قربنا من بعض وبقينا نتكلم كثير لقيتك غير كده خالص، وبدأت أفهمك لقيت (ركن صغير) كده جواك كان نفسي أدخله وأعرف إيه اللي جواه، لكن فشلت!

- أنتي كنتي بتعملي إيه في إسكندرية؟

- كان عندي مؤتمر وخلص وراجعة القاهرة، أنت كنت بتعمل إيه؟

- ولا حاجة، جيت النهارده وبعد ٥ ساعات قررت أرجع.

- إيه! أنت كويس؟

- أنا تمام، بس زي ما قولت لك كنت بحاول (أدور) على حاجات كتير.

- زي إيه؟

- (زي إيه؟) سؤال حلو، لا سؤال حلو فعلا، بس يا ريت الأسئلة البسيطة اللي من نوعية (زي إيه؟)، و(ليه؟) كانت إجابتها بسيطة زيها. مفيش حاجة تتحكي قوي غير إن كل الأحداث الفترة الأخيرة من حياتي وصلّتي أسأل نفسي كام سؤال وأدورهم على إجابة.

- ووصلت؟

- دي حكاية طويلة قوي.

- ولو حتى حكاية طويلة، ما تحكي لي احنا ورانا إيه؟ احنا بقالنا كتير ما بنتقابلش وأفكر زمان إننا كنا قرييين من بعض جدا فلازم تحكي لي إيه اللي حصلك وأنا مش موجودة.

- أحكي؟ طب والله فكرة، ليه لأ؟ اسمعي هحكلك حدوتة حصلت من حوالي ٤ شهور، بس ركزي معايا عشان ما بحبش الأسئلة الكثير، اتفقنا؟

- اتفقنا، احكي.



كان يوم ٣٠ ديسمبر ٢٠١٦، كان يوم جمعة تقريبا، ميعادنا كان الساعة ٣ نزلت من البيت بحماس شديد، الهوا كان جميل والشوارع كانت فاضية نسبيا يوم جمعة وفي أواخر ديسمبر يعني احتفالات وتجهيزات للعام الجديد، جو ديسمبر بالذات في حاجة أو ما فيهبوش، لكن احنا دايمًا بنبرر حينا غير الممنطق للناس والأشياء بأن (فيها حاجة)، حاجة إيه؟ ما حدش عارف.

خرجت من باب العمارة في طريقي للجراج، طلعت بالعربية وفي أقل من ربع ساعة كنت وصلت قدام المكان، ركنت في أقرب مكان لقيته وقفلت العربية، ودخلت المكان بهدوء، كان فاضل نص ساعة على الميعاد، بدأت أتأمل الناس الموجودة في المكان وشد انتباهي ولد وبنت قاعدين على الترابيزة اللي جنبني، البنت واضح إنها صغيرة؛ سنها ما يزيدش عن ٢٢ سنة والولد كان أكبر منها نسبيا أو في نفس السن تقريبا، مش عارف، البنت كان واضح إنها متعصبة جدا وبتتكلم بعصبية وهو يحاول يهديها لكن مش عارف، وفجأة سككت وبدأت تعيط.

كان واضح من ارتباك الولد لما شاف دموعها بأنه يبحبها، لكن عجزه عن احتواءها كان واضح.

مش دي المشكلة، المشكلة إنه محاولش إنه يطمئنها بأي حاجة، هو ما تكلمش أصلاً، كان هالين عليا أقوم أحاول أهدي البنت شوية وأحاول أفهم منه سبب عجزه التام عن إنه يطمئنها ولو بالكلام.

- اتأخرت عليك؟

- أنتي دايا متأخرة! إيه الجديد يعني؟

- لا أنت اللي بتيجي بدري عن ميعادك.

- أقعدي.

قعدت ومن غير ما تشرب أي حاجة بدأت تتكلم:

- مش قادرة أعيش من غيره، مش شايقة غيره.

كاميليا صاحبتي من واحنا صغيرين وعارفها كويس، عنيدة وذكية وقوية مش سهل إنها تتعلق بحد بالطريقة دي، كاميليا مش محتاجة نصيحتي تعمل إيه وما تعملش إيه.

لو أنا عاقل وموزون، كاميليا أعقل مني ١٠٠ مرة، لكن لمعة عنينا وهي بتتكلم كانت بتوضح قد إيه وجوده كان مهم بالنسبائها.

- وبعدين يا كاميليا؟

- مش عارفة، كل الناس في عنيا هو، مش عارفة أتخيل نفسي

مع حد غيره.

- طب ما تتكلمي معاه يا كاميليا؟

- ما بقاش ينفع.

- "مش قادرة تنسيه؟".

سألتهما السؤال ده وأنا نفسي أسمع: "لا قادرة"، لكنها ردّت عليا بنبرة فيها كسرة نفس وتحدي غريب.

- أيوه مش قادرة أنساه، لكن هيجي يوم ولازم أقوم، لازم أعرف أتخيل نفسي مع حد غيره، وأشوف إن الحياة بتمشي.

- ده نضج عاطفي ولا كلام وقت الحزن؟

- ده لقاء أعلى درجات اليأس مع المنطق، أنا عملت كل حاجة أقدر إني أعملها؛ وقفت جنبه واستحملت ظروف كتير وضغوط وغيابه اللي بالأيام، كنت الركن الهادي اللي بيسمعه وبيحاول يريجه زي ما كان يقول لي، كنت راضية بأقل حاجة وما طلبتش أي حاجة، هو أنا وحشة؟

- لا يا كاميليا، أنتي مش وحشة أنتي جميلة وألف واحد يتمنى إنه يكون معاك، بس النصيب يا كاميليا.



حاولت أغير الموضوع وأتكلم معها في أي حاجة ما لهاش لزمة وأقولها قفشات أفلام من الي ضحكنا عليها ١٠٠ مرة قبل كده وضحكنا وهزرنا.

- شكرا إنك موجود وبتسمعني.

- أنا معاكي وجنبك دايم يا كاميليا، يلا عشان تروّحي.

سبت كاميليا ومشيت، ومنظر كاميليا وهي بتحكي ومنظر البنت وهي بتعيط مش مفارقني، بدأت أربط الاتنين ببعض، دموع البنت ما كنتش فارقة مع الولد عشان كده محاولش إنه يطمّنها ولا هو كان عاجز فعلاً، وكاميليا بنت ذكية وهادية وجميلة ما تستاهلش أبداً إنها تتوجّع بالشكل ده، بدأت أفكر احنا ليه بناخد خطوة الارتباط واحنا مش جاهزين ليها؟ ازاي ما بناخدش بالنّا إن العلاقة دي هتفشل؟ هو احنا بنكون أضعف لما بنحب ولا أضعف لما بنتساهل مع الي بنحبه؟ أسئلة كثير ما لقتلهاش إجابة، رجعت البيت وعملت كباية شاي وقعدت على الكنبه أقرأ وعلى الساعة عشرة بالليل جالي تليفون من (مُعاذ) صديقي وزميلي في الشغل، رديت وأنا قلقان:

- أنا عايز أسألك سؤال مهم جدا.

- استر يارب! عايز إيه يا معاذ؟

- هو أنا غبي؟

- إيه؟

- هو أنا غبي؟

- سمعت، سمعت يا معاذ، بس بحاول أستوعب إنك متصل

بيا الساعة عشرة بالليل عشان تسألني أنت غبي ولا لأ، عموما لا  
يا معاذ أنت مش غبي.

- أمال ليه محدش بياخد رأيي في حاجة؟ والي بياخد رأيي

بيعمل عكسه؟!

- يا معاذ يا حبيبي مش لازم عشان تبقى ذكي إن الناس تاخذ

رأيك، ومش لازم عشان بيعمله عكس رأيك إنك تبقى غلط أو  
غبي بس ممكن رأيك ما يكونش مناسب في الوقت ده هي دي كل  
الحكاية يا معاذ.

- البنت اللي أنا بحبها بتاخذ رأي أصحابها في كل حاجة إلا أنا!

- وهي عارفة إنك بتحبها؟

- لا.

خدت نفس عميق قبل ما يجيلي شلل وعديت ٣٠٠٢٠١، شهيق وزفير، شهيق وزفير.

- بص يا معاذ قبل ما أفقد أعصابي، قولها إنك بتحبها الأول وبعدين إبقى فكر هي هتاخذ رأيك ولا لأ، فهمت.

- ما أنا بخاف أعترفلها عشان ما خسر هاش، وحاسس إنها مش واخدة بالها مني أصلاً، على طول بتتكلم مع ناس غيري وبتهزر معاهم وكلامها معايا محدود، ما هو مش معقولة إنها هتسيب كل الناس الي حواليتها ويعرفوا يضحكوها ويتكلموا كتير وتحبني أنا!

- أنت عندك كام سنة؟

- ثلاثة وعشرين.

- ٢٣ سنة ولسه مش واثق في نفسك!! لازم تثق في نفسك يا معاذ، لازم تخرج بره الدائرة الي أنت حابس نفسك جواها وتتكلم مع الناس وتتعامل معاهم وتبطل تراقبهم من بعيد لبعيد، فاهمني؟

- فاهم، حاضر هحاول.

- سلام يا معاذ.

- سلام.

قفلت مع معاذ وأنا بفكر ازاي ولد زي معاذ مش قادر يثق في نفسه وحاسس إنه غبي بسبب تجاهل الي حواليه ليه، إيه الي يخيلنا نضيع وقتنا وطاقتنا في أسئلة ما لهاش معنى؟ أوقات كثير قوي بنكون عارفين إجابات للأسئلة الي بنسألها وبتكون واضحة قدامنا لكن دايمًا بندور على إجابة تانية تكذب الإجابات الواضحة؛ لأننا رافضين نتقبلها، بندور على الإجابة الي عايزين نسمعها عشان نحاول نعلق نفسنا بإن في أمل وإن ممكن الي احنا عاوزينه يحصل، ومن وسط مليون سؤال ممكن الواحد يسألهم مفيش غير سؤال واحد بس كنت محتاج أعرف إجابته وهو:

- ازاي الناس ممكن من غير قصد يكونوا سبب في فقدان الثقة في النفس؟

وقبل ما أحاول أدور على إجابة للسؤال كنت نمت.

\*\*\*

"القطار رقم ٩٣٠ المتجه إلى القاهرة سوف يتحرك خلال ثلاثين دقيقة الرجاء سرعة التوجه للرصيف".

- أنت كنت مصدق الكلام الي أنت قُلْتَه لمعاذ؟

- أنا ما بقولش حاجة غير وأنا مقتنع بيها، معاذ شاب طموح

لكن دايا شاييف إنه أقل من اللي حوالياه وإنهم فاهمين أكثر منه وهيكسبوه في أي تحدي أو أي شغل جديد ممكن يطلب منه، دايا شاييف إن في حد ممكن يعمل الحاجة دي أحسن منه، وده خلق جواه نوع من أنواع الاستسلام للأمر الواقع.

- تعرف الرجالة فيهم حاجة حلوة جدا، بيعرفوا يخلقوا أنفسهم ولى حوالياهم وبينهم وبين بعض (جو التحدي)، دايا شاييفين إنهم كرجال ما ينفعش يكون في حاجة اسمها صعبة ويشجعوا بعض إنهم يعملوا الحاجة دي ممكن ما ينجحوش بس يكفيهم شرف المحاولة، الرجالة دايا عندهم اهتمامات وحاجات مختلفة وممكن حاجات تافهة بس حاجتهم ومتطلباتهم بتكون بسيطة، عكس الستات تمامًا؛ احنا بنركز في تفاصيل التفاصيل واهتماماتنا كتيرة جدًا وعلى طول عايزين نكون حلوين في نظر اللي بنحبهم ونهتم بالموضة والميك أب، وعايزين ناكل وما نتخنش ولو واحدة وزنها زاد ٣ كيلو تحسسك إنها نهاية العالم، الراجل ممكن يزيد ٥٠ كيلو وما يحسش أصلاً، المهم حصل إيه بعد كده؟ جاوبت على السؤال ثاني يوم الصبح؟

- سؤال مين! ولا افكرته أساسًا، صحيت ثاني يوم عملت كباية الشاي وجهزت لنفسي الفطار ولبست بنطلون جينز أسود

وقي شيرت أبيض ونزلت، ركبت العربية، كان يوم السبت آخر يوم في السنة، ويوم السبت ده يوم مش مفهوم إذا كان أجازة ولا يوم شغل عادي، تحسي إنه بداية تحضير الروح الشريرة ليوم التلات، ركبت العربية وشغلت موسيقى هادية ووقفت في إشارة روكسي العظيمة ربع ساعة، وصلت الشغل ركنت العربية، وقبل ما أوصل مكتبي وبالظبط عند الأسانسير شوفتها وهي واقفة لوحدها وأول ما شافتنى ابتمست وقالتلي:

- صباح الخير.

- صباح الخير (يا فريدة).

- مستعجل ليه ده لسه بدري على ميعادك؟!

بصّتلها باستغراب وقولت لها:

- أنتي عارفة إني بحب دايا أكون موجود قبل ميعادي.

- هو أنت مضايق مني؟

- هضايق منك ليه يا فريدة، بصي يا فريدة أنتي عندك كام سنة؟

- اتنين وعشرين.

- حلو، يعني أنا أكبر منك بتلات سنين صح؟

- لا ستين ونص بس .

- اسمعي بس، أنا أكبر منك وعارف مصلحتك، أنتي تطلعي دلوقتي مكتبك في الحسابات وتشتغلي على ميزانية السنة، لا، أنتي تراجعلي ميزانية ٣ سنين فاتوا وتقارني بينهم وبين الميزانية دلوقتي وتحطي تصوّر للميزانية الخمس سنين الجايين، ماشي يا فريدة، يلا يا ماما بالتوفيق .

ودي دايمًا طريقتي في إنهاء المحادثات عديمة الهدف اللي بتفتعلها (فريدة الصياد) كل يوم قدام الأسانسير وأنا طالع مكتبي أو نازل منه .

(فريدة الصياد) بنت مجتهدة ومحترمة لكن لسبب ما (ثقيلة) على قلبي، طلعت المكتب سلّمت على معاذ من بعيد لبعيد عشان أتفادي الدخول في مناقشات مشاكل الجيل الخامس اللي ما بتخلصش بتاعة معاذ اللي بتضيّع لي ٤ ساعات من اليوم. قعدت على المكتب وفتحت اللاب توب وشربت القهوة الصباحية المظبوطة جدا من إيدين عم (ربيع) أطيب وأجدع مسؤل بوفيه فيكي يا مصر، وبكده أكون خلصت كل طقوس (المكاتب الحكومية).

بدأت أكتب في التقارير اللي كان لازم أخلصها وبعد ساعتين

تقريبا خلصت كل التقارير، وقبل ما أبدأ أشرح لمعاذ إني محتاج منه تعديل على بعض الحاجات في الخطط المعروضة، دخلت مريم وقعدت على الكرسي الي قدام مكتبي، وقالتلي:

- عندك شغل كثير وكالعادة هعطّلك، صح؟

- إيه شغل الأفلام المصري ده؟!

- ما هو أكيد واحد زيك عامل ماجيستير وواحد دكتوراه، ومدير قد الدنيا، أكيد ما بيتفرجش على تليفزيونات.

- لا بتفرج عادي، بس ما بحفظهاش زيك! المهم تشربي إيه يا مريم؟

- لا سبقتك وشربت الكابتشينو في مكتبي، عندك شغل كثير؟

- آها عندي إيميلات عايز أبعثها وخطط عايزة تتعدل وخطط عايزة تتنفذ، وبالمناسبة دي أحب أناشدك بما إنك المدير المالي للشركة والحسابات بإنك يا ريت الميزانيات تتبعتلنا كاملة التفاصيل مش التكلفة النهائية بس.

- حاضر، هحاول أفهمهم ده في الإدارة عندي.

- صحيح، حسام خطيبك عامل إيه؟



- حسام كويس، خطيبته هي اللي مش كويسة.

- مالك في إيه؟

- حاسة إني تايهة، مش موجودة في علاقتي بحسام حاسة إنها علاقة من طرفه هو بس، أنا مكتتش عايزة الحياة دي أنا مجبرة عليها، أهلي فضلوا يتكلموا معايا ويقنعوني بإني أشوف حسام وأديله فرصة وإني لازم ألحق نفسي قبل ما القطر يفوتني، وبسبب إصرارهم وعشان أهلي ميزعلوش وافقت وشوفته واتكلمت معاه ولقيته شخص محترم وعريس زي ما بيقوله (لُقطة)، معرفتش ألاقي أي سبب للرفض، وافقت واتخطبنا في خلال شهر، بس مش حاسة بإني عايزة أكمل، أنا عندي ٢٥ سنة ولسه مشاعري موجودة وقادرة إني أحب واتحب.

- ما تحاولي مع حسام يا مريم؟

- ما ينفعش، هي بتيجي فجأة كده ما بتحاولش هو زي الحادثة تقدر تعرف إنك هتعمل حادثة في الوقت ده وفي المكان ده وازاي؟  
- لا.

- مش هعرف أعمل ده مع حسام، وفي نفس الوقت حسام شخص طيب وجدع وما يستاهلش مني إني أجرحه بالشكل ده،

ما بقتش عارفة أعمل إيه؟

- اعملي الي يريحك يا مريم، فكري وخدي وقتك، أطلبي من حسام يسيلك فرصة تكوني مع نفسك ولو حدك، وعرفيه إن ده في مصلحتكم أنتو الاتنين وشوفي أنني عايزة إيه والي قادرة تعمليه، دي حياتك ومفیش حد هيعيشها مكانك مفیش حد هيحس بوجعك قدك، فاهماني يا مريم؟

- فهماك، هعمل كده أكيد، يلا أسيبك لشغلك.

بصيت لمريم وهي ماشية وأنا مصدوم وهي بتبتسم ابتسامة وجع وبتقلّي:

- ربنا يكفيك شر الحياة الي بتعيشها بإيد غيرك.

خدت الكلمتين دول وأنا بحاول أجمع أفكارى ومش عارف قدرت أكمل اليوم ازاي!

وما بين الإيميلات والاجتماعات والخطط وتعديلها وتنفيذها بيعدي يوم الشغل، وخلصت شغلي على الساعة ٤ بالظبط وقفلت اللاب توب ولميت حاجتي ووقفت قدام الأسانسير ولقيتها واقفة قدامه.

- مستعجل ليه؟ وراك حاجة مهمة؟

- أها يا فريدة ورايا حاجات مهمة جدا، عشان كده هنزل على السلم.

مشيت من قدامها ونزلت على السلم وركبت العربية وكلام مريم ما فارقنيش لحظة، في كام واحدة زي مريم خدت خطوة الخطوبة والجواز لمجرد إن القطر ما يفوتهاش، وفي كام واحد زي حسام اتجوز العروسة اللي " طنط ميرفت " اختارتها، ويعني إيه القطر يفوتنا أصلاً وهيفوتنا ليه؟ ليه البنت لو وصلت لسن " الكام " وعشرين ولسه متخطبتش أو اتجوزت يتقالها القطر هيفوتك؟ مين قرر إن القطر هيفوته؟ هو اللي بيقدر ده عارف الغيب؟ معنديش أي مشكلة مع فشل العلاقات لكن يكون لهدف أو بسبب قوي؛ " مش عارفين يتأقلموا مع بعض "، " التفاهم بينهم صعب "، " خيانة "، أسباب فعلا عائق لاستمرار العلاقة، ليه دايا شافين إن الجواز حاجة مهمة وتكتب في الـ CV بتاعنا في الحياة؟ الجواز مش آخر محطة في حياتنا، الجواز قرار مش سهل أبداً، ده قرار بين اثنين بيدأو الحياة سوا ولازم يكون عن حب وتفاهم، الحب والتفاهم زي حجر الأساس اللي بيتبني عليه بقية العمارة، من غيرهم العمارة مش هتكمّل وهتقع، الجواز هو نهاية قصة الحب بين الطرفين مش بداية جديدة.

- أنا عندي رأي مختلف شوية، مهتم إنك تسمعه؟  
- أكيد طبعاً.

- الجواز هو توثيق مهم جدا لحالة الحب بين الطرفين، الناس اللي حبت وهي صغيرة وقرروا يعيشوا حياتهم مع الشخص ده قرار الجواز بالنسبالهم كان سهل، الناس اللي ما شافتش تجارب فاشلة وعاشوا قصة واحدة وقرروا إنهم يتجاوزوا القرار بالنسبالهم كان سهل، لكن الناس اللي عاشوا تجارب فاشلة وعرفوا معنى الوجد والحزن دول قرار الجواز بالنسبالهم صعب وأوقات بيكون مُرهق؛ لأنهم بيكون جواهرهم بواقى من الماضي، ركن متعلق في كل التصورات والتخيلات اللي كانت موجودة في العلاقات السابقة، والبواقى دي بتبدأ تهاجمهم بمجرد ما يفكروا إنهم ممكن ياخدوا قرار بالجواز.

- جاييز! وفي ناس بتخاف تسبب متلاقيش حد تاني يجبها، أو مقتنعين إن مفيش حد تاني هيجبهم بعيوبهم وكل حاجة فيهم عشان كده بيرضوا بالموجود حتى لو وحش، بس خوفهم من الوحدة والخسارة مكتّفهم ومش قادرين يعملوا حاجة، تحسي إنهم محبوسين في دائرة مقفولة وييلفوا جواها يمكن يلاقوا أي مكان يقدرُوا يخرجوا منه لكن مفيش فايده.

- عندنا نقص في فكرة التحمل.

- مش فاهم! يعني إيه نقص في فكرة التحمل؟

- ما بنقدرش نتحمل فكرة الخسارة أو فكرة إن شخص معين مش هيكون موجود، أو إننا نتحمل فكرة نغير حاجة اتعودنا عليها عشان بقينا مرتبطين بيها ارتباط شديد، لمجرد إننا نهرب من إحساس التحمل أو من كون إننا مُطالبين بالتحمل، بنرضى بأي حاجة وبأقل حاجة، نرضى بقصة حب ناقصة، نرضى بقعدة على الرصيف، بمسكة إيد، بكلمة حلوة، أي حاجة بسيطة تعلقنا ونعتبرها أمل في حاجة كبيرة جاية واحنا متأكدين إننا بنرضى بيها؛ لأننا معندناش القدرة في التحمل لخسارة أي حاجة موجودة في حياتنا، حتى لو كانت بتأذينا، بس أحسن بكتير من إننا نجرب حاجات تانية واحنا مش عارفين إذا كانت هتبسطنا ولا هتأذينا أكثر، يعني تقدر تقول مبدأ "اللي نعرفه أحسن من اللي ما نعرفوش".

- نقص في فكرة التحمل! حلو المصطلح ده.

- قول لي بقى، أنت ليه مضايق من فريدة؟

- مش مضايق، بس مش قادر أستحمل أسلوبها وطريقتها ولا أسئلتها الكثيرة، مش عارف بس مكتتش قادر أتأقلم معاها، المهم

عشان متناميش مني، بعد ما وقفت في كم إشارات مرعب أخيراً وصلت البيت، ركنت العربية وطلعت غيرت هدومي وعملت كباية الشاي وقعدت أقرأ وبالرغم من إنه آخر يوم في السنة وكل واحد لي طقوس مختلفة بيقضي فيها اليوم؛ في ناس بتقضي اليوم خروج ولعب، وناس بتقضيه قعدة في البلاي ستيشن، وناس بتقضيه قدام التلفزيونات تتفرج على مسرحية العيال كبرت، وناس بتكلم ناس تانية عشان تقولهم Stay With Me In 2017 وغالباً بيمشوا، طقوس كتير بنقدر نعيش بيها اليوم ده، لكن أنا بعنبره يوم عادي زي أي يوم، سنة هتخلص وهندأ سنة جديدة بنفس تسلسل الأيام مع اختلاف رقم السنة يعني مفيش اختلاف جديد، طبعا ده مش معناه إن الناس اللي بتخرج وبتلعب دول أوفر أو حاجة لا خالص كل واحد ولي حريته في استقبال السنة الجديدة، بأمنيات جديدة وأمل جديد إن يتحقق فيها اللي متحققش السنة اللي فاتت، أنا استقبلت السنة الجديدة بالقراءة؛ حاجة بسيطة وسهلة ومش مُرهقة ومش محتاجة مجهود ولا تفكير، وعلى الساعة ١٢ منتصف الليل جالي التلفون المعتاد،

- حادثة يا معاذ؟

- لا حادثة إيه بعد الشر، أنا بتصل عشان أقولك Happy New

.Year

- هابي نيويير يا معاذ، متأكد إنك كويس؟
- أنا مبقتش قادر أكمل مع البنت دي.
- هو أنت كنت بدأت معاها يا معاذ من الأساس
- لا، بس طلعت خاينة.
- يا ساتر يارب، خاينة! ازاي، وعرفت مين؟
- هحكيلك، احنا في جروب على الواتس آب اسمه " Friends "
- " بتتكلم في كلنا مع بعض وبنهزر وبنضحك، في الأول كانت بتتجاهلني وتهزّر مع الناس كلها إلا أنا وكنت ساكت، لكن النهاردة الصبح لقيتها منزلة (ستوري) صورة ليها هي وواحد من الجروب خرجت معاها واتصورت وده كله من ورايا من غير ما تقول لي، أنا خلاص مش هقدر أكمل معاها.
- ده بجد يا معاذ؟
- أيوه يابني بقولك خلاص أنا عملت للإنسانة دي (Block).
- يا معاذ ما تكلمها وتفهم منها ما ممكن يكون زميلها عادي.
- يابني لا، هي كمان بقت تعمل (Like) و (Follow) لشباب

تانية على الانستجرام، ده غير آرائها وتوجهاتها غيري خالص وده باين جدا على تويتر وكيان...

في اللحظة دي بدأت أتعدّل في قعدتي وقاطعته قبل ما يكمل كلامه:

- بقولك إيه يا معاذ، ما تقفل (الساير) اللي فتحته في وشي ده وكلمها افهم منها أحسن!

- ما بتفتحش الماسنجر، وما بكلمهاش على الواتس كثير غير في الجروب.

- لا يا معاذ أنت مش فاهمني، أنا أقصد تقعدوا مع بعض تتقابلوا يعني.

- لا ما هو احنا ما بتتقابلش.

- ما بتتقابلوش! يعني إيه ما بتتقابلوش؟ دي حاجة طبيعية إنكم ما بتتقابلوش، يعني أنت ماشوفتش الإنسانية دي ولا مرة قبل كده؟

- ماشوفتهاش ازاي؟ ده أنا بقالي ٦ شهور بشوفها كل يوم وحافظ شكلها.



- مش فاهمني، قصدي ما تعرفش هي منين؟ بتشتغل ولا لا؟  
بتحب إيه وبتكره إيه؟

- ازاي يابني! ده أنا حافظ الـ (About Info) بتاعها على الفيس بوك.

- يا عم فتح مخك معايا بدل ما أبطحك! مش يمكن تكون  
سخيفة؟ مختلة عقليا؟ بتاكل زي الأرنب؟ بتشرب القهوة بشفاطة؟  
- لا حوار الأكل والقهوة ده أنا عارفة كويس. ده احنا كلنا  
وشربنا القهوة سوا ١٠٠ مرة في (لايف الفيس بوك).

في اللحظة دي كنت فقدت أعصابي، ومقدرتش أستحمل أكثر  
من كده :

- وهو ده اسمه حب يا معاذ؟!!

رد عليا بكل هدوء وقالني :

- It's a Social media relationship

وأثناء ما أنا بحاول أقاوم أعراض الشلل الرباعي اللي بدأت  
تظهر عليا افتكرت حاجة مهمة جدا :

- بقولك إيه يا معاذ، أنت كنت قُلتلي قبل كده إنها عرّفتك على

أختها، طب ازاي؟.

- أها ده حصل فعلا، من شهرين دخّلتني في جروب أنا وهي وأختها وعرّفتني عليها، دي لذيذة جدا.

- لا لا كده كثير، كثير!!

- اهدى بس، كده كده الموضوع باظ خلاص.

سكت معاذ شوية وسألني بسداجة شديدة :

- بقولك ايه، تعرف أسباب فشل العلاقات اللي بتبدأ (Online)؟

- يا شيخ اتنيل! مش لما أبقي أعرف أسباب فشل العلاقات اللي بتبدأ (Offline)!

سكت معاذ شوية تانيين زي ما يكون بيفكر في سؤال ثاني يقضي بي عليا ويخليني أتشل زيادة وقال لي :

- بقولك ايه.

رحت مقاطعه وقلت له :

- بقولك إيه أنت، أنا مضطر أعملك (Unfollow) قصدي أقفل معاك، عشان عاوز أنا!

\*\*\*

- تعرف إن مُعاذ صاحبك ده ظريف جدا.

- لو عاجبك شيلي، حلو الخاتم اللي أنتي لابساه ده؟

- أها، اشتريته من سنة من عند (عم ماجد) بتاع الفضة.

- ياااه، عم ماجد! بقالي كتير قوي ما رُحُتش عنده، أنا فاكراً لما كنا بنخلص الجامعة ونتمشّي لحد عنده ونتفرّج على الخواتم والدُّبل، راجل طيب قوي وكنا نتكلم معاها وينصحنا ويحكي لنا ذكرياته الجميلة، كانت أيام حلوة جدا.

- فعلاً كانت أيام جميلة، المهم قول لي، أنت ليه هجمت على معاذ لما قالك إنه في علاقة افتراضية؟ الـ Social Media بقت كلمة متداولة في حياتنا اليومية. الفيسبوك مثلاً، كيان ضخّم جداً، فيسبوك دلوقتي بقى عليه أكثر من ٥٠ مليون حساب في مصر لوحدها يعني تقريباً كل الناس اللي في دايرتك الاجتماعية ممكن تقابلهم على الفيس بوك سواء كانوا الحاليين أو في المستقبل، الواتس آب مثلاً بقى أسهل من الاتصال، وبيخلّص عليه صفقات، وبيتناقش عليه مشاريع، ومذاكرة، وممكن تكلم أي حد في بلد ثانية صوت وصورة، والموضوع بقى منتشر جداً نقدر نعتبر الـ Social Media نادي اجتماعي كبير.

- أنا معاكي، لكن برضو الصوت حاجة تانية، والصورة حاجة تالته خالص، مهما وصلنا لمراحل تطور تكنولوجيا في وسائل الاتصال، اللحم والدم هو الي بيحسسك بالإنسان الي قدامك وبيقربك منه.

- عندك حق، المهم كمل، صحيت تاني يوم.

- بالظبط، صحيت عملت كباية الشاي والفتار ولبست تي شيرت أسود وبنطلون جينز كحلي، نزلت وركبت العربية، وقبل ما أطلع من الجراج سألت نفسي سؤال غريب جدا : " هو أنا إيه الي ببسطني؟ ".

قعدت في العربية أفكر في إجابة للسؤال ده لكن موصلتش لحاجة، ١٠ دقائق كاملة مقدرتش أوصل فيهم لأي حاجة بتبسطني ، أنا نسيت أنا إيه الي كان بيفرحني، وصلت الشركة مش فاكتر في وقت قد إيه ولا وقفت في كام إشارة، دخلت وقفت قدام الأسانسير، قابلت فريدة الصياد وسمعتها وهي بتقول لي:

- Hppay New Year .

- معقولة أنا نسيت إيه الي بيفرحني؟

- يارب السنة دي تكون حلوة عليك وتحقق فيها كل الي

بتتمناه.

- طب ازاي؟ هو أنا في حاجة معملتهاش؟ أكيد أنا ناسي حاجة!
- بس أنت النهارده باين عليك مضايق، مالك؟
- لا مش ناسي، لا ناسي، أنا ازاي مش عارف إيه اللي بيفرحني؟
- ركبت الأسانسير ومن غير ما أرد على ولا كلمة قالتها فريدة  
الصيداد ودخلت المكتب سلمت على معاذ من بعيد لبعيد وفتحت  
اللاب توب وأنا مستغرب جدا من نفسي أنا ازاي وصلت للحالة  
دي، وامتى وصلتلها، طلعت موبايلى وكلمتها:
- ألو، الحقيني يا لمياء أنا نسيت إيه اللي ببسطني؟
- اهدى بس وخلينا نتقابل، هستناك بعد الشغل في نفس المكان.
- تمام، سلام.
- قفلت معاها وأنا بحاول أفكر أي حاجة لكن كل المحاولات  
فشلت وكأنني عندي فقدان ذاكرة مؤقت، وقبل ما دماغني تنفجر  
دخل عم ربيع:
- تشرب حاجة يا أستاذ؟
- قهوة مظبوط يا عم ربيع، هو أنا ممكن أسألك سؤال يا عم

ربيع؟

- انفضل يا بني!

- أنت بتمنى إيه؟ إيه هدفك في الحياة؟

- بتمنى الستر والصحة وراحة البال، وهدفي إني أكبر العيال وأشوفهم أحسن ناس في الدنيا وما خليش أم العيال محتاجة أي حاجة.

- مبسوط يا عم ربيع؟

- الحمد لله على كل حال يا بني وحتى لو مش مبسوط، أنا راضي والرضا أهم ما في الحياة.

- تسلم يا عم ربيع، قهوة مضبوط بعد إذنك.

- حاضر يا أستاذ.

استغربت جدا من إني مش عارف أنا بتمنى إيه ولا إيه هدفي في الحياة، وحسدت عم ربيع حتى لو إنه بتاع بوفيه، بس على الأقل عنده هدف وعارف هو عايش ليه، إنما أنا عايش ليه معرفش، أنا فقدت الشغف بكل حاجة، اليوم بيتكرر بكل حاجة في، مش فارقة بداية سنة جديدة من نهاية سنة قديمة كل حاجة زي ما هي ما

بتتغيرش، حياتي اتحولت لحياة روتينية خالصة خاليه من أي تحديات أو تجديدات، بطلت أفكر في أي حاجة شغلاني وبدأت أشتغل وما بين الإيميلات والاجتماعات والخطط وتعديلها وتنفيذها بيعدي يوم الشغل وخلصت شغلي في وقتي بالظبط الساعة ٤ ولسه ورايا حاجات كتير أعملها بكرة، لميت حاجتي وخرجت بسرعة وقفت قدام الأسانسير وكانت واقفة كالعادة:

- بتتمنى إيه يتحقق في السنة الجديدة؟

- معلش يا فريدة أنا مستعجل جدا ومش هقدر أجابوك.

سببتها ونزلت على السلم ماستنيش الأسانسير وركبت العربية، وصلت المكان كانت الساعة ٦ تقريبا وكانت لمياء لسه موصلتش طلبت كابتشينو وبعد حوالي ٥ دقائق وصلت لمياء:

- تشربي إيه؟

- كابتشينو برضو!

- واحد كابتشينو تاني بعد إذنك.

- مالك بقي؟ احكي لي.

- أنا مش فاكّر أنا كنت بحب أو بتبسّط بإيه؟

- طب خيلنا نفتكر مع بعض وبما إني مخرجة أفلام خيلنا نبداً بالأفلام، أنا فاكدة إنك كنت بتحب فيلم If Only ، ده من الحاجات اللي ممكن تبسطك.

- أها، الأفلام اللي بحبها، أتفرج على أفلام بحبها كثير.

- وكم ان فاكدة إنك كنت بتحب تكتب، اكتب كثير.

- الكتابة كانت بتفرحني جدا، هرجع أكتب تاني.

- شخبط في أي حاجة، واطب الحاجات التافهة اللي كنت بتكتبها وبتوريها لي دي.

ضحكت على كلامها وعلى أسلوبها وهي بتقول الجملة دي بأداء سينمائي وبتحاول تقلد هنيدي.

- شكرا يا لمياء إنك موجودة.

- المشكلة مش في إنك نسيت إيه اللي ببسطك، المشكلة إنك حبست نفسك جوا دائرة معينة ونسيت نفسك جواها وبقيت بتلف مهما تلف برضو بترجع لنفس النقطة، لازم تغير كل حاجة، تغير نشاطك، تغير حياتك، تغير هدومك، تعيش يوم بتفاصيل مختلفة، تعيش في دائرة تانية غير اللي أنت حابس نفسك جواها، أخرج وقابل ناس ما قابلتهاش من فترة، اعمل أي حاجة جديدة



تخليك تحس بإنك عايش.

- حاضر، أكيد هحاول أعمل كده، تصبّحي على خير يا لمياء.

مشيت وأنا بفكر في كلام لمياء، وإني لازم أغير وأعمل حاجات جديدة، لمياء مش مجرد حد أنا بثق في رأيه أو أقرب حد ليا وبس لا، لمياء دي مرايتي، لمياء هي الوحيدة اللي فضلت لما الكل اختار إنه يبعد، عندها شركة صغيرة للإنتاج وبتحاول تحقق حلمها بإنها تاخذ جائزة أحسن مخرجة في الوطن العربي، لمياء طموحة جدا وذكية جدا وهادية جدا، وصلت البيت كانت الساعة ٨ بالليل، طلعت غيرت وعملت كباية الشاي وقعدت على السرير أقرأ وعلى الساعة ١٢ منتصف الليل كنت نمت.

\*\*\*

"القطار رقم ٩٣٠ المتجه إلى القاهرة سوف يتحرك خلال خمس عشرة دقيقة، الرجاء سرعة التوجه للرصيف".

- اللي يشوفك وأنت بتنصح معاذ، ما يصدقش إنك مش عارف إيه اللي ببسطك!

- الوحدة صعبة جدا بتفقدك معنى الحياة، ما بتكونيش عارفة أنتي عايشة ليه أو مين؟ بترضي بالدوامه اللي بتسحلك فيها الدنيا

لمجرد إنك ما تفكر يش أنتي محتاجة إيه؟ بيكون جواكي مليون سؤال وسؤال وبتعملي نفسك مش شايفاهم عشان عارفة إن إجابتهم هتوجعك، أو مش هتلاقي حد يجاوبك عليهم، معاذ عنده طاقة ونشاط وعايز يحب ويتحب، معاذ عنده سبب وحاجة يعيش عشانها، لسه عايز يبدأ حياته.

- وأنت حياتك انتهت؟

- ده الي كنت قربت أوصله، وھتعرفيه لما أكملك بقية الحكاية.

- كمل، أنا بقيت مشتاقة أعرف إيه الي حصل بعد كده.

صحيت تاني يوم كان يوم الاثنين وده بقى يوم غريب مش مفهوم، مش فاهم الدنيا زحمة ولا فاضية لكن هو اليوم الي بدأ أفوق في من صدمة يوم الثلاث بتاعة الأسبوع الي فات، اليوم ده عامل زي "عاطف" في فيلم الناظر صحيت عملت كباية الشاي والفتار ولبست قميص أبيض على بنطلون رمادي كلاسيك ونزلت ركبت العربية، وقفت في إشارة روكسي العظيمة ربع ساعة وأنا بتأمل الناس والوشوش، كان في جنبي اتنين صحاب راكبين على موتوسيكل ومن غير ما أقصد سمعتهم وهما بيتكلموا صوتهم كان أعلى من إني مسمعوش، بصراحة الولد الي كان قاعد ورا هو

اللي بدأ بالكلام وهو يقول لصاحبه:

- هفضل لحد امتي أحلم بأحلام كبيرة وغيري يحققها؟  
صاحبه رد عليه بكل هدوء ولا مبالاة:

- يا عم أنت آخرك تحلم، تحقيق الأحلام ده مش بتاعنا، احلم  
وأنت ساكت بقى.

حاولت أفهم معنى جملة "تحقيق الأحلام ده مش بتاعنا"، يعني إيه مش بتاعنا؟ طيب هو ليه مش بتاعنا؟ أmaal بتاع مين؟ مين في إيده تحقيق الحلم؟ طيب هو يقصد إن الموضوع بإيد ربنا؟ هو يقصد إيه بإنه مش بتاعنا؟ الحقيقة إن الكلمة طلعت مطاطة جداً ليها معاني كتير جداً، طيب صاحبه فهمها ازاى؟ كنت عايز أنزل من العربية وأسأل الشخص ده عن معنى الجملة لكن للأسف في الوقت ده كانت الإشارة فتحت، مشيت وأنا لسه بفكر في معنى الجملة مش عارف أوصل لمعنى محدد، يعني عايز أعتبرها إن تحقيق الحلم بإيد ربنا تمشي، أعتبرها إن الحلم كبير ومش هنقدر لوحدنا نحققه تمشي، تحقيق الحلم محتاج مجهود ووقت وصبر واحنا مش هنقدر على كده تمشي، معاني كتير جداً وكلها تنفع، بس أكيد هو كان يقصد معنى معين أنا مقدرتش أفهمه، أو ممكن أكون فهمته

بس مش عارف إيه هو بالظبط!

وصلت الشركة وركنت العربية ودخلت المكان وقفت قدام الأسانسير، لكن حصلت حاجة غريبة أول مرة تحصل، فريدة مش موجودة، طلعت المكتب سلمت على معاذ من بعيد لبعيد ودخل عم ربيع:

- تشرب حاجة يا أستاذ؟

- قهوة مضبوط لو سمحت يا عم ربيع.

- من عنيا يا أستاذ.

دخلت فريدة وهي بتقول:

- صباح الخير عليكم كل...

وقبل ما تكمل بقية الجملة لقيت معاذ انفجر في وشها:

- عايزة إيه يا فريدة؟ كل شوية تيجي هنا وتتكلمي عايزة إيه؟

- معاذ أنا آسفة مش قاصدة إني أضايقك.

- أنا مش مضايق يا فريدة، ممكن تُروحي على مكتبك بقي؟

اتفضلي.

خرجت فريدة وراحت على مكتبها ورجع معاذ على مكتبه

بمتهى الهدوء وكأنه معملش أي حاجة، ما كنتش فاهم تصرف معاذ، ليه عمل كده؟ لكن ما حاولتش أفهم سبب تصرفه بصراحة وما بين الإيميلات والاجتماعات والخطط وتعديلها وتنفيذها بيعدي يوم الشغل وخلصت شغلي الساعة ٤ بالظبط وأنا ورايا حاجات كتير أعملها ثاني يوم، لمّيت حاجتي ونزلت على السلم ماستنيتش الأسانسير وركبت العربية، ورُحْتُ "قهوة عجيبة" عشان أقابل مصطفى وإسلام صحابي، قهوة عجيبة اسم على مسمى "عجيبة" فعلا قهوة صغيرة ومحدقة كده على أول الشارع اللي في الشركة اللي بشتغل فيها، قهوة فيها اللي مش موجود في أي كافيه في العالم؛ "الروح"، قهوة عجيبة فيها روح حلوة جدا بداية من "محمود القهوجي" مروراً بـ "مسعود عامل الشيشة" والحاج "أنور" صاحب القهوة، قعدة القهوة مفيهاش قوانين زي "Minimum Charge"، "ممنوع دخول المأكولات"، ممكن أي حد ياخذ معاه الأكل وأول ما القهوجي يشوفه ينزله إزاحة المية ومن غير ما يطلب وببلاش كمان، القهوة مفيهاش حاجة اسمها العدد "Complete" بمجرد ما توصل هتلاقي مكان اتخلق من تحت الأرض، القهوة حدوته وحكاية كبيرة قوي مش هيفهمها جيل ستاربكس وكوك دوور.

ركنت العربية في أقرب مكان لقيته ودخلت كان مصطفى وإسلام موجودين، قعدت معاهم وطلبت نسكافيه، قعدنا نتكلم ونرغي في أي حاجة لكن كان واضح على مصطفى إنه مش كويس.

- مالك يا مصطفى في إيه؟

- مش عارف عنها حاجة بقالي أسبوعين، بتّصل بيها ما بتردش، والواتس آب بتاعها اتقفّل، هي لو قررت تبعد تعرّفني عشان أنا كمان ما فضلش معلق نفسي بإنها هترجع.

- كمل حياتك يا مصطفى ما توقفش حياتك عشان حد، هي لو كانت عايزاك كانت هتحاول بمليون طريقة إنها توصلك وتفهمك وتتكلم معاك.

- أكمل حياتي! حياتي الي هي إيه؟ حياتي الي رسمتها معاها ومتخيلها في كل جزء فيها؟ ولا حياتي الي فيها أحلام حلمنا إننا نحققها سوا؟ ولا حياتي الي بتحلى بوجودها؟ أنهي حياة بالظبط الي أكملها؟ هي مش مجرد واحدة حبيتها، هي واحدة عشت معاها ٩ سنين من حياتي بكل تفاصيلها ومشاكلها، عشت معاها لحظات ضعفها وانكسارها، لحظات فرحتها، دموعها، ضحكاتها، مشاكلها في شغلها، مشاكلها مع أصحابها، مشاكلها التافهة، حالتها

النفسية الي ما بتكونش مفهومة في أوقات كثير، سهر ومكالمات ورسايل وكلام وخطط اتفقنا ننفذها سوا، أماكن كثير لينا فيها تفاصيل وحكايات، الموضوع أكبر بكثير من إنه واحد حبّ واحدة وسابته.

ما كنتش عارف أرد على مصطفى أقول إيه؟ كلام مصطفى أقوى من أي حاجة ممكن تتقال، إيه الكلام الي ممكن يتقال في موقف زي ده؟ وبعد لحظات من الصمت إسلام قرر إنه يسيب الموبايل من إيده ويتكلم وقال:

- الوهم، ما لكم مستغربين ليه؟! أها وهم، في ناس موهوبة في بيع الوهم، ناس قادرة تحليك تشك في نفسك، قادرين يقنعوك إن الكون كله بيتآمر عليهم، قادرين يقنعوك إنهم ملايكة ويحاولوا ينقذك من الشياطين الي حواليك في كل حنة، الناس دي معندهاش مشكلة في أي حاجة، وعندهم دايا حجة مقنعة للغياب أو للبُعد أو لأي تصرف بيعملوه، متقدرش تمسك عليهم غلطة ولا تفهم هما يفكروا ازاي، ولا هما وحشين ولا حلوين، ولا هما أبيض ولا هما أسود، رمادي دايا، معندهمش مشكلة أبدًا إنهم يعيشوا معاك سنين وفي منهم بيكمل لآخر العمر لكن عمره ما كان صادق، هو وجوده لهدف معين بيحققه ما تعرفش لحساب

مين بيحقق الهدف ده، بس بيكونوا مستمتعين وهما بيععوا الوهم  
 للي حواليهم، مُتعتهم في الحياة تدمير الي حواليهم، ما لهمش عزيز  
 ودايا ينتقدوا أي حاجة حلوة تفكر فيها، دايا يصدروا ليك فكرة  
 الحزن واليأس وإنك مهما تعبت مش هتوصل ولا هتتحقق حاجة،  
 يعيشوا معاك خيالات وأحلام، ويرسموا معاك حياة مستقبلية  
 مثالية، وفي النهاية يمشوا بدون سابق إنذار، بعد ما يتأكدوا إنك  
 مش هتعرف تعيش الأحلام دي مع حد تاني ولا هتقدر تبني  
 حياتك من جديد، في الوقت ده بيكونوا حققوا هدفهم ووجودهم  
 ممكن يفضحهم، وقبل ما ده يحصل بيختفوا، يتبخروا وكأنهم حلم،  
 لكن هما في الحقيقة مجرد ناس موهوبة في بيع الوهم.

-الفيلسوف إسلام اتكلم أخيراً، بقولكم إيه أنا هقوم يلا  
 تصبحوا على خير.

مشيت وسببتهم وأنا بفكر في " الوهم " وافكرت جملة الشاب  
 بتاع الصبح " تحقيق الحلم ده مش بتاعنا "، هو كان بيعع الوهم  
 لصاحبه ولا كان فعلاً قاصد معنى معين بالجملة دي؟ احنا ليه  
 بنشتري الوهم أصلاً؟ نعرف ازاى إن الشخص الي قدامنا بيعع  
 الوهم؟ أسئلة كثيرة كل يوم بتزيد عن اليوم الي قبله ومفיש  
 إجابات، قادر أشوف إن كل المواقف والأسئلة مرتبطة ببعضها



وفي نفس الوقت قادر إني أفصل كل موقف لوحده، مش عارف أبدأ تفسير منين، مش قادر أشوف مين صح ومين غلط؟ مش قادر أحدد كل واحد المفروض يعمل إيه في مشكلته؟ وصلت البيت وكانت الساعة ٧ بالليل وأنا موصلتش لأي إجابة لأي سؤال، طلعت وغيرت هدومي وعملت كباية الشاي وقعدت على السرير أقرأ ومش فاكّر في وقت قد إيه كنت نمت.

- تعرف إني متعاطفة مع مصطفى صاحبك جدا.

- هو يستاهل التعاطف فعلاً، مصطفى عنده ٢٥ سنة، واضح، صريح، مَلُوش في اللف والدوران، ما بيعرفش يخون، جدع، كان بيحكى دايمًا إنه نفسه يكوّن بيت وأسرة مستقرة ويسافر كثير ويبدأ حياته مع الإنسانية دي ويحقق أحلامه معاها وتكون هي السر الي محدش يعرف عنه حاجة، حاجات كثير كان مجهزها لكن فجأة مشيت وما بقتش موجودة من غير أسباب.

- أصعب إحساس في الدنيا إني أبني حياتي على شخص ويحيي الشخص ده بكل هدوء يقول: " مش هقدر أكمل، أنتي تستاهلي حد أحسن مني ". في الوقت ده بيكون في إحساس واحد بس؛ " العجز "، العجز عن التفكير، العجز عن الرد، السؤال الي بيطلع بمنتهى التلقائية: " بالبساطة دي؟ "، لما أنا أستاهل حد أحسن

منك، ظهرت ليه؟ دخلت حياتي ليه؟ أفكار كثيرة وأسئلة أكثر بتكون جوانا ومحتاجين إجابات وتفسير واضح ليها، لكن بعد فترة بنكتشف إننا محطات في حياة بعض، في ناس هيتيجي تقعد فترة وتمشي وتعلمك درس عمرك ما هتنتساه، وناس تعدي عليك تسيلك ذكرى وسيرة حلوة، وناس هيتيجي عند المحطة بتاعتك عشان يستريحوا ودول غالبا اللي علاقتنا بيهم بتبدأ وتخلص من بعيد لبعيد، كل محطة وليها وقتها وليها ناسها، لكن الصعب مش إننا ننسى الناس دي، الصعب إننا ننسى ذكرياتنا معاهم ننسى أحلامنا، إننا نهذ الحياة اللي تعبنا فيها عشان نوصلها سواء، الوجد بيخلينا نفكر ألف مرة قبل ما نحاول إننا ناخد أي خطوة جديدة.

- مشكلة الوضوح والاصطناع، في بداية العلاقة كل واحد فينا بيحاول يداري أسوأ ما فيه ويحاول يبين الحلو وبس ويصطنع حاجات مش موجوده جواه ويتعامل بيها، ومع الوقت بيان كل حاجة وتبدأ الحياة تضلّم وكل طرف يدور على طريقة يثبت فيها إنه هو أكثر طرف متحمل عبء العلاقة بالكامل والطرف الثاني يبدأ يدور على مبررات تثبت إن الطرف الأول غلطان وتتحول العلاقة لـ " حرب " إثبات الذات، وفجأة العلاقة توصل لنقطة بيقدر فيها أحد الطرفين إنها تكون النهاية، بالرغم من إن الطرفين ممكن

يكونوا يحبوا بعض جدا وبجد، لكن الاصطناع وعدم الوضوح دمروا كل حاجة.

- احنا قلبناها نكد ليه كده؟ ما تشوفلنا مكاملة من مكالمات معاذ خيلنا نضحك.

- للأسف معاذ مكلمنيش يومها، الي كلمني كان حد ثاني؛ على الساعة ١ بعد منتصف الليل جالي تليفون من كاميليا:

- في إيه يا كاميليا؟ أنتي كويسة؟

وقبل ما تتكلم وتقول أي حاجة عيّطت.

- مالك يا كاميليا في إيه؟

- خطوبة "مجدي" يوم الخميس الجاي.

- خطوبة مين؟

- "مجدي" الي قالي إنه مش عايز يظلمني معاه بسبب إنه مش قادر يكون نفسه ويتجوزني، خطوبته الخميس الجاي على المعيدة زميلته في الكلية.

في الوقت ده اتعدلت في قعدتي وولّعت الأباجرة الي جنبني وأنا بحاول أهديها وقولت لها:

- ما يستاهلكيش يا كاميليا أنتي تستاهلي حد يشوفك من جواكي، حد يشوفك أغلى حاجة في حياته ويبذل مجهود عشان يحافظ عليك، أنتي تستاهلي حد يقدرك.

- أنا مش زعلانة إنه هيخطب، ولا زعلانة عليه أصلاً، أنا زعلانة على مشاعري وعلى التضحيات اللي قدمتها، زعلانة على قلبي اللي كان بيقول لي إنه خايف وكنت بقوله إن خوفه ده مجرد وهم، زعلانة على إني مستاهلش كل ده.

- ربنا كبير يا كاميليا وشايف كل حاجة، وأكد هيعوضك بالأحسن والأنسب ليكي.

- أنا واثقة في حاجة زي دي، وأكد ربنا مش هيسيب حقي، أسيبك عشان تنام، سلام.

- سلام يا كاميليا.

قفلت مع كاميليا وقبل ما أحاول أفسر أي حاجة كنت نمت.

\*\*\*

"غزل البنات بـ (جنية)، اللي عايز الحلو، غزل البنات بـ (جنية)، الحلو للأطفال والكبار".

- الله، غزل البنات!
- بعد إذنك يا حاج، اتنين لو سمحت.
- اتفضل يا بني.
- الله، بحبه أوي، هو أنت مش هتاخذ واحدة؟
- لا مش عايز أنا جايلك الاتنين، عارف إنك بتحبيه وكمان بتحبني الشيتوس، والكاب كيك، وعصير الفراولة.
- مش بقولك أنت ذاكرتك قوية، ما شاء الله، بس أنا برضو مش فاهمة كاميليا ضعيفة ولا قوية؟
- كاميليا قوية جدا، أو تبان قوية جدا، كاميليا واحنا صغيرين ما كنتش بنت ضعيفة أبدا كانت بتعرف تواجهه، وتتكلم وتناقش، ما كنتش بتعيط بسهولة، أفكر عمري ما شوفتها بتعيط واحنا صغيرين، هدفها محدد.
- عارف، البنت الي زي كاميليا لما بتكبر بتكون أضعف بكثير من أي بنت عادية، لكن هي بتستخبي ورا الوش الي لابساه بتاع البنت القوية الجامدة الي ما بتتأثرش بسهولة، وفي الحقيقة هي بتتأثر بأقل كلمة، البنت العادية وهي صغيرة بتعيط وتضعف وده كله ببيان قدام الناس، كلهم بيشفوا انكسارتها وهزيمتها وأوقات

يشوفوا اكتئابها، البنات دي لما بتكبر بيكونوا اتعلموا حاجات كثير، وبيكون عندهم القدرة يواجهوا مشاكلهم ويعرفوا يتعاملوا مع لحظات انكسارهم وضعفهم، لكن اللي زي كاميليا بتشوف إنه لو بان ضعفها وانكسارها قدام الناس صورتها هتبقى مهزوزة، في حاجة جواها هتبقى مشروخة مش هتعرف ترجعها تاني لطبيعتها، عشان كده بيكون الأفضل ليها إنها تلبس وش القوة وتستخبي وراه بقية حياتها؛ لأنها اتعلمت إنها تواجه كل حاجة بقوتها لكن لما بتكبر بتكون طاقتها خلصت، ما بتكونش قادرة إنها تواجه أي حاجة حتى لو كانت بسيطة.

- لكن كاميليا لسه فيها حطة مش عايزة تستسلم للضعف مش عايزة تتكسر، وده بيبان أوقات كثير في نبرة صوتها وهي بتتكلم، وكلامها بيتحول من انكسار وحزن لتحدي، إنها لا قادرة تعمل الحاجة دي في يوم من الأيام، حتى لو كانت شايفة إنها مش هتعرف تعمل ده دلوقتي، لكن مع الوقت هتقدر، ومش هتستسلم.

- جايز! المهم احكي لي إيه اللي حصل بعد كده، صحيت تاني يوم.

بالظبط، صحيت تاني يوم عملت كباية الشاي والفتار ولبست نفس اللبس قميص أبيض وبنطلون رمادي كلاسيك، يوم التلات

ده يوم الروح الشريرة ودايا ما بغيريش في لبسي بتاع يوم الاثنين، نزلت وركبت العربية، وقفت في إشارة روكسي العظيمة أكثر من نص ساعة، بتأمل فيها الوشوش والناس، وحناقات السواقين مع بعض، إنها لعنة يوم التلات، بعد نص ساعة الإشارة الحمد لله فتحت وصلت الشغل ركنت العربية ودخلت الشركة وقفت قدام الأسانسير وكانت موجودة.

- ازيك، يارب النهارده تكون مبسوط؟

- أنا كويس يا فريدة، في حاجة؟

- لا مفيش، هو أنت مضايق مني؟

- النهارده إيه يا فريدة؟

- التلات، ليه؟

- ويوم التلات ده يوم كئيب يا فريدة، وبصراحة لما بشوفك بتفكريني بيوم التلات، بعد إذنك.

ركبت الأسانسير وطلعت مكتبي وسلمت على معاذ من بعيد لبعيد، ودخل عم ربيع:

- تشرب حاجة يا أستاذ؟

- قهوة مضبوط يا عم ربيع بعد إذنك.

- من عنيا يا أستاذ.

فتحت اللاب توب وقبل ما أبدأ أعمل أي حاجة دخلت فريدة  
وقبل ما تتكلم أو تقول أي حاجة لقيت معاذ قام من مكانه ووقف  
قدامها ويقولها:

- خير يا فريدة، عايزة إيه؟ كل شوية تيجي ليه؟

قولت ألحق معاذ قبل ما يمسكها يُخنقها أو يرميها من الشباك  
وقولت له:

- خلاص يا معاذ، اهْدَى.

وبصيت لفريدة وقولت لها: "خير يا فريدة في إيه؟".

فريدة ردت عليا وكان واضح إنها "اترعبت" من معاذ:

- هو أنا مش عارفة معاذ مضايق مني ليه؟ بس هو أنا ممكن  
أتكلم معاك شوية بعد الشغل؟

- آسف يا فريدة مش هينفع؛ لأنني عندي مشاوير وحاجات  
كثير جدا بعد الشغل.

- تمام، وآسفة لو ضايقتك أنت أو معاذ.



- لا مفيش أي حاجة، اتفضلي.

مشيت فريدة وأنا مش فاهم ليه معاذ بيتصرف بالطريقة دي لما بيشوفها في المكتب وماكتش مهتم إني أعرف الحقيقة، وما بين الإيميلات والاجتماعات والخطط وتعديلها وتنفيذها بيعدي يوم الشغل وخلصت شغلي الساعة ٤ بالضبط وأنا ورايا حاجات كتير أعملها وقبل ما أقفل اللاب توب جالي تليفون،

- ألو، في حاجة يا مصطفى؟

- تعالى على القهوة عايز أتكلم معاك.

- حاضر، ربع ساعة وأكون عندك.

لميت حاجتي ونزلت على السلم ماستنيتش الأسانسير وركبت العربية ورُخت "قهوة عجيبة"، مصطفى كان قاعد وقبل ما أطلب أي حاجة، أو أسأل في أي حاجة، مصطفى اتكلم على طول:

- أنا عايز أتجوز.

- تتجوز! تتجوز مين؟

- أنا عارف إنك ليك صحاب بنات كتير، ممكن تختارلي أنسب واحدة فيهم.

- إيه! أنت بتقول إيه؟

في اللحظة دي إسلام دخل وقعد معانا وطلب رز بلبن،  
ومطصفي بيكمل كلامه:

- عايز أتجوز واحدة من صحابك، اختارلي واحدة.

- أكيد مش هينفع وأنت عارف إني ضد المبدأ ده.

- مش مشكلة، سييك خلاص.

وبعد لحظات من الصمت قرر إسلام يسيب "علبة الرز بلبن"  
اللي كان بيقتريها وقال:

- ثلاث شباب زي الورد مش لاقين بنات عشان يتجوزوهم؟  
رديت عليه وقولت له: "النصيب يا إسلام".

كمل كلامه وقال:

- عارفين أنا مؤمن جدا بالحب من أول نظرة، مؤمن بالنصيب  
والقدر، مؤمن بأن الإنسان بيحب بروحه قبل ما العين تشوف  
الشخص ده، مقتنع تماما بأن الحب هو بداية العلاقة لكن مش  
العلاقة كلها.

قعدنا نتكلم ونهزر ونضحك على أي كلام فاضي وبعد شوية

قولت لهم إني همشي وركبت العربية وأنا بفكر في الحالة الي وصلها مصطفى وإنه ازاى يطلب مني طلب زي ده؟ فشل علاقة ممكن يوصل الشخص بإنه يرضى بأي حاجة، يرضى بأي بديل حتى لو ما يبجوش، وصلت البيت وكانت الساعة ٨ بالليل طلعت وغيرت هدومي وعملت كباية الشاي قعدت على السرير أقرأ وبعد شوية مش فاكركم قد إيه كنت نمت.

- أنت رفضت تساعد مصطفى عشان رافض المبدأ فعلا، ولا في سبب تاني؟

- لا، رافض المبدأ، أنا ضد " جواز الصالونات " تماما، مش لأنه غلط، لكن نسبة فشله كبيرة جدا، اتنين ولا يعرفوا بعض ولا بينهم أي مشاعر بيتقابلوا لمجرد إن " طنط ميرفت " شافت " وفاء بنت طنط زيزي " في فرح وشايقة إنها مناسبة " لحماة ابن طنط عفاف "، مفيش أي مشاعر ولا تواصل بين الطرفين، هيقعدوا مع بعض هيعرفها على نفسه وتعرفه عليها ويقولها هو عايز إيه في البنت الي هيتجوزها، الحاجات دي موجودة فيها، تمام على بركة الله نقرأ الفاتحة، وشهر يتخطبوا، الشهر الي بعده يتجوزوا، وتبدأ الخلافات وكل واحد بيان على طبيعته، وكل طرف يكون مقتنع إنه مش هيقدر يكمل مع الطرف التاني، وينفصلوا، الجواز عن

حب بيفرق لو في مشاكل بين الطرفين هتخلص بينهم، في طرف هيتنازل عشان العلاقة تمشي، في روح في العلاقة في تفاهم، وأوقات بيحصل انفصال، على الرغم من إنهم متجوزين عن حب، لكن في بعض الأوقات الجواز بيكون فيها هو نهاية قصة الحب، مش توثيق ليها نهائي.

- وإيه اللي حصل بعد كده؟ صحيت تاني يوم.

- لا، على الساعة ١٢ منتصف الليل جالي مكاملة من مريم:

- ألو، يا مريم خير، أنتي كويسة؟

- أها كويسة.

- باباكي ومامتك كويسين؟

- أها كويسين، أنا بس عايزة أتكلم معاك شوية.

- خير يا مريم!

- أنا قررت إني مش هكمل مع حسام، مش عارفة ألاقى نفسي، حاسة إن الدبلة اللي كنت لابساها دي كانت خنقاني ومكتفاني، كنت حساها ثقيلة قوي عليا، مش هقدر أكمل.

- وبلغتي حسام بالموضوع ده؟

- بلغته، وبيقول لي إنه عايز يقابلني ونتكلم، يمكن أديله فرصة تانية، وأنا مش حاسة إني عندي الطاقة إني أديله فرصة تانية؛ لأنه ما يستاهلش غير كل خير، مش عايزه أروح أقابله ويحس إن في أمل وأنا واحدة قراري بإني مش هكمل، مش عايزة أقابله وأشوف في عنيه نظرة مش عايزة أشوفها، مش هقدر أستحمل أشوفه وهو يحاول إنه يقنعني إننا نكون مع بعض، حسام شخص كويس قوي، لكن مش هقدر أكون معاه مش هعرف أبسطه، أنت فاهمني؟

- فاهمك يا مريم، فاهمك، ما تقابليهوش يا مريم، إنهي العلاقة من بعيد أحسن، سيبيله ذكريات حلوة بلاش تقابليه ويشوف في عنيكى نظرة إنه صعبان عليكى، أو يحس بالقسوة من ناحيتك.

- حاضر.

قفلت مع مريم وأنا صعبان عليا " حسام " جدا، شخص من الأشخاص الي اعتمدوا على " طنط ميرفت " في إنها تجيبيله عروسة، وقابلها وعجبته واتخطبوا، لكن الاتنين معندهم مش الرغبة في إنهم يكونوا مع بعض، سألت نفسي أسئلة كتير جدا لكن من وسط ١٠٠ سؤال ممكن الواحد يسألهم لنفسه، جه في دماغى سؤال واحد ومحتاج إني أعرف إجابته ومش عارف أفكر غير فيه وهو:

- ليه بنرضى بالعلاقات الناقصة وبنخاف ندور على سعادتنا ولا بنكسل ندور أصلاً؟

وقبل ما أحاول أدور على أي إجابة كنت نمت.

\*\*\*

- ازاي مفيش رغبة يكونوا مع بعض واتخطبوا؟!

- اتخطبوا؛ لأنهم لما قعدوا مع بعض مفيش حد منهم كان قادر يطلع عيب في الثاني يرفضه بيه، علاقة كانت من تخطيط أهل حسام وأهل مريم بمساعدة طنط ميرفت طبعاً، حلقة الوصل المهمة جداً في "جواز الصالونات"، أحياناً بسأل نفسي: كان إيه اللي هيحصل لو طنط ميرفت ما كنتش موجودة؟ كان مين هيقول: "ما شاء الله يا حبيتي كبرتي وبقيتي عروسة؟"، أو كان هيقول:

"إيه يا حبيبي مفيش بنت عجبك كده ولا كده؟"، أو يقول: "مفيش حاجة جاية في السكة؟"، أنا هعرف مينين إذا كان في حاجة جاية في السكة ولا لا، أنا مش ساحر ولا عالم غيب عشان أعرف حاجة زي دي، الحقيقة إن طنط ميرفت أسألته ما لهاش إجابة، احنا محتاجين شخص خبرة وعقل وناضج بالشكل الكافي يقولنا إجابات واضحة وصريحة نقدر نجابوب بيها على الأسئلة دي،

لكن الرغبة بين مريم وحسام ما كنتش موجودة، مفيش حد منهم اتخطف وقال خلاص لقيت الشخص اللي عايز أكمل معاه بقية حياتي، أوقات كثير ما بنكونش بنحب الشخص اللي قدامنا لدرجة العشق لكن في حاجة جوانا بتخطفنا، حاجة بتشدنا للشخص ده، حاجة جوانا بتقول هو ده الشخص اللي عايزين نعيش معاه، ده ما كنتش موجود بين حسام ومريم، كان طبيعي اللي حصل إنه يحصل سواء دلوقتي أو بعدين، كان في وقت هيظهر في الملل، البرود، الروتين، المشاعر اللي بتقتل العلاقة.

- بس الملل والروتين والبرود بيظهروا في أي علاقة حتى لو كانت عن حب، دي حاجة أساسية ولازم تحصل؛ لأننا بشر، وكلنا عندنا طاقة وأوقات بتخلص مش هنقدر نكون متحمسين في نص العلاقة زي أول العلاقة، هتحصل مشاكل بين الطرفين، هيكون في طرف مشغول عن الثاني شوية، في طرف احتمال يزهدق، أحداث كثير ممكن تحصل هتوصل العلاقة إن يظهر فيها نفس المشاعر.

- عندك حق، لكن الحب بيفرق، يعني الشخصين اللي حبوا بعض وأخدوا قرار بالجواز بيحصل بينهم مشاكل، لكن عندهم قدرة على التجديد على المقاومة، شخصين عندهم الرغبة في إنهم يكملوا مع بعض، شخصين بيسندوا بعض.

- جازيز، كمل إيه الي حصل بعد كده؟

صحيت تاني يوم عملت كباية شاي والفطار ولبست قميص وبنطلون كلاسيك، يوم الأربعاء الحقيقة أنا بحب اليوم ده جدا معرفش ليه بحبه، بس يوم خفيف كده وهادي وأحداثه بتكون كثير وفي الأغلب بتكون حلوة، نزلت وركبت العربية، وقفت في إشارة روكسي العظيمة، وبعد ٥ دقائق فتحت الإشارة وصلت الشغل وركنت العربية ودخلت الشركة وقفت قدام الأسانسير وكانت موجودة.

- ازيك يارب تكون كويس النهارده؟

- أنا تمام يا فريدة، ممكن أسأل سؤال يا فريدة؟

- أها طبعا اتفضل.

- ليه بتقفني تستني هنا كل يوم؟

- لو تديني فرصة ونتقابل بعد الشغل هتعرف الإجابة.

- مش فاهم، ممكن توضحي أكثر!

- محتاجة أقرب منك أكثر وأكون جزء من حياتك.

- فهمت، للأسف مش هينفع يا فريدة، أنا آسف، بعد إذنك.



- كنت متأكدة إنها معجبة بيك، ليه رفضتها؟

- لأنه ما ينفعش، أنا وفريدة ما فيش بينا حياة عشان نقدر نتأقلم سواء، أنا مش قادر أستحمل كلامها معايا كل يوم دقيقة قدام الأسانسير هقدر أستحمل إننا نكون في علاقة سواء، لا مش هقدر، وعناصر العلاقة مش موجودة.

- عناصر العلاقة! يعني إيه؟

- يعني الكيميا بينا مش متركة، الإعجاب موجود لكن من طرف واحد، الاحتياج والرغبة من طرف واحد مش سبب كافي لوجود العلاقة، الإعجاب والرغبة والاحتياج مشاعر لازم تكون متبادلة بين الطرفين.

- تفكر كان ممكن ده يحصل لو كنت سمحتلها بالفرصة؟

- لا، كان مستحيل يحصل؛ لأن أنا رافض فريدة نفسها مش رافض أسلوبها أو طريقة اهتمامها.

- تمام، كمل.

سبت فريدة وركبت الأسانسير وطلعت مكتبي دخلت وسلمت على معاذ من بعيد لبعيد ودخل عم ربيع:

- تشرب حاجة يا أستاذ؟
- قهوة مضبوط بعد إذنك يا عم ربيع.
- حاضر، من عنيا.
- فتحت اللاب توب وبدأت أشغل وبعد حوالي ساعتين دخلت المكتب وقعدت على الكرسي الي قدام مكتبي وقالت:
- معطلك كالعادة صح؟
- صح يا مريم، أنتي كويسة؟
- جدا، بقالي فترة كبيرة جدا كان نفسي أحس الإحساس ده.
- إحساس إيه؟
- حاسة إني عندي طاقة كبيرة أوي، حاسة إني عايزة أعيش حياتي بدون قيود عشان كده قررت إني آخذ أجازة مفتوحة أعيش فيها حياتي ومرجعش منها غير وأنا محققة كل أهدافي.
- وإيه أهدافك يا أستاذ هاري بوتر؟
- ما تتريقش عليا.
- أنتي مش سامعة نفسك بتقولي إيه؟ أجازة مفتوحة وأهداف وأنتي اللي زيك المفروض تكون مجروحة وبتنزّل " حالات واتس

آب "تقطيع شرايين وبنات بتعيط وبتحضن المخدة وكده يعني .

- الله يخربيت السوشيال ميديا الي بوظت سُمعتنا، لا أنا مش هعمل كده؛ لأن أنا متأكدة إني كنت في علاقة بتستنزفني، علاقة مش بتاعتي، عشان كده مش ندمانة ومبسوطة بقراري وراضية عنه جداً، أنا عندي أهداف كتير ونفسي أحققها ومن أول أهدافي ألاقي نفسي.

- ربنا يوفقك يا مريم.

- أسيبك عشان تكمل شغلك، سلام.

خرجت مريم وكملت شغلي وأنا مبسوط جدا باللي مريم وصلته وما بين الإيميلات والاجتماعات والخطط وتنفيذها وتعديلها بيعدي يوم الشغل وخلصت شغلي الساعة ٤ وأنا لسه ورايا حاجات كتير أعملها بكرة، قفلت اللاب توب ولميت حاجتي ونزلت على السلم ماستنيتش الأسانسير، ركبت العربية ورُحْتُ القهوة كان مصطفى وإسلام موجودين قعدت معاهم وطلبت نسكافيه ومصطفى بدأ بالكلام وقال:

- إسلام كان عنده حق، في ناس موهوبة في بيع الوهم فعلاً.

رد إسلام بكل غرور: " طبعاً يابني أنا خسارة في القعدة دي

أصلاً".

- إسلام أنا في سؤال نفسي أسألهولك من زمان جداً وأعتقد ده وقته.

- سؤال إيه؟ إسأل يا مصطفى أنا جاهز لأي سؤال.

- أنت إيه دورك في الحياة؟ يعني عمرك ما اتكلمت عن علاقتك ببنت، أو في بنت عجباك وعازب تكلمها، أو حاجة في حياتك عازب تحققها، أنت عايش بتعمل إيه؟ بتشتغل بس؟

اتعدل إسلام في قعدته وبابتسامة وبهدوء جابوب:

- أنا كنت مستني السؤال ده من بدري قوي من أي واحد منكم.

في اللحظة دي أنا اتعدلت وبدأت أركز مع إسلام؛ لأنني كنت عازب أعرف ليه إسلام كان منتظر السؤال ده، وكَمَل كلامه:

- احنا أصحاب بقالنا فترة طويلة، كنا كتير في المدرسة ولما وصلنا لمرحلة الجامعة اتفرقنا وبتقابل على فترات على حسب ظروفنا، وبعد الجامعة اتفرقنا أكثر بسبب الجيش ومشاعل الحياة وفضلنا احنا الثلاثة بس مع بعض، لكن كان في سؤال جوايا بيتردد كل فترة ومش عارف أوصل لإجابة وهو: "ليه مفيش حد مُهتَم يسمع

مشاكلي أو أهدافي؟"، ولما اتفرّقنا ومبقاش فاضل غيرنا كنت مستني السؤال ده؛ لأن المفروض إننا نشارك بعض كل لحظاتنا، وإجابته بكل بساطة إن أنا مش حاسس إن في واحدة قدرت تخطفني غير واحدة بس، لكن ما عنديش الجرأة الكافية لمواجهتها؛ لأنها مرتبطة وبالمناسبة البنت دي "كاميليا".

قاطعته وقولت باستغراب:

- كاميليا! أنت بتحب كاميليا، ده بجد؟!

- أها، إيه المشكلة؟ كاميليا بنت جميلة وذكية وهادية وقبل كل ده خطفت قلبي وعقلي وعاييزها تكون معايا طول الوقت، لما شوفتها أول مرة معاك حسيت بحاجة غريبة، ما كنتش مركز غير معاها هي بس في القعدة، ضحككتها وطريقة كلامها ونظرات عنيتها ولخبطتها في الكلام، قولت ممكن عشان أول مرة أشوفها يعني مجرد إعجاب لحظي وخلاص، بس مع الوقت اكتشفت إنه حب من أول نظرة، بفرح جدا لما بكون سبب في ضحككتها، حاولت كتير ألاقي أي مسمى تاني للي بيحصل لكن اتأكدت إني وقعت في الحب.

اتكلمنا بعد كده في حاجات كتير وضحكنا وهزرننا وبعد حوالي ساعة قومت وسببتهم ومشيت، ركبت العربية وأنا مبسوط جدًا،

كاميليا هتلاقي الشخص اللي يستاهلها ويحبها ويعتبرها أهم وأعلى حاجة في حياته فعلاً، وصلت البيت كانت الساعة ٨ بالليل غيرت هدومي وعملت كباية الشاي وقعدت على السرير أقرأ وبعد شوية نمت، وعلى الساعة ١٢ منتصف الليل جالي التلفون المعتاد:

- حادثة يا معاذ؟

- حادثة إيه بعد الشر!

- خير يا معاذ في إيه؟

- أنا عايزك تركز معايا كده وتسمعني كويس وتختار معايا واحدة من الاثنين أرتبط بيها.

- هي بدلة يا معاذ! مش كتالوج هو يا حبيبي.

- بص أنا عارف إنك رافض المبدأ ده ومابتحبوش، بس ساعدني.

- هساعدك.

- الأولى اسمها "نور" ٢٢ سنة خريجة كلية تجارة جميلة جداً،  
والثانية اسمها "شروق" ٢٣ سنة خريجة فنون جميلة وهادية  
وكويسة.

- أنا مطلوب مني إيه بقى؟
- أنا محتار أرتبط بمين فيهم، اختار معايا؟
- مين بتسمع مشاكل الجيل الخامس بتاعتك ومابتزهقش؟
- الاتنين بيسمعوا ويحاولوا يلاقوا حلول معايا كمان.
- مين فيهم بتحب هزارك؟
- الاتنين برضو.
- مين فيهم بتسأل عليك وبتفتقدك لما بتغيب فترة؟
- الاتنين برضو، بيسألوا عليا كل يوم ولما بكون زعلان بيحاولوا يهنونا عليا ويقفوا جنبى وكده.
- ارتبط بالاتنين يا معاذ، مش عارف أقولك إيه؟
- بص خلاص أنا اخترت "نور" دمها خفيف أكثر.
- بجدد، طب الحمد لله.
- بس خايف "شروق" تكون بتحبني، أصل ساعات كده بتفضل تقول لي إني مهم بالنسبالها، خايف أختار نور وأكون خسرت شروق وهي بتحبني.

بدأت أحاول أقاوم أعراض الشلل الرباعي، الي بدأت تظهر عليا بسبب كلام معاذ.

- اختار شروق يا معاذ، طالما مهم بالنسبها اختار شروق.

- نور كمان بتقول لي إنها ما بتعرفش تتخيل يومها من غير ما تكلمني، خايف أختار شروق وأخسر نور.

- لا، لا كده كثير، ارحمني يا معاذ، أنت عايز إيه؟

- أنا عايز أرتبط وأحبّ.

- يا معاذ يا حبيبي مفيش حب وارتباط بالطريقة دي، أنت لازم تكون عارف أنت عايز إيه كويس أنت هتختار البنت دي ليه، مش كتالوج و هتختار منه واحدة وتقول هي دي، الارتباط والحب مشاعره وعلاقة قائمة على التفاهم بين الطرفين، ولو في طرف مش محتاج أو مش مُهتم بالطرف الثاني العلاقة دي هتفشل، فاهم يا معاذ؟

- فاهم، بس أنا زهقت من الوحدة، نفسي أجرب إحساس إن حد يهتم بيا، حد يومه يكون ناقص من غيري، حد أروحله في عز ضعفي، حد أستقوي بي ويكون معايا ونكمل الرحلة سوا، مش عايز أفضل لو حدي.



- مش هتكون لوحذك وأكيد ده هيحصل بس لما تلاقي الشخص الي يخطفك.
- إن شاء الله، سلام.
- سلام يا معاذ.

قفلت مع معاذ وحاولت أفكر ليه بنتعب نفسنا بأسئلة ترهقنا وتتعبنا وإجابتها مش موجودة عندنا أصلاً؟ ليه بنعيش حياتنا ندور على حاجات بعيد عنا وهي ممكن تكون قريبة مننا؟ وقبل ما أجابوب على الأسئلة دي كنت نمت.

\*\*\*

"القطار رقم ٩٣٠ المتجه إلى القاهرة سوف يتحرك خلال خمس دقائق، الرجاء سرعة التوجه للرصيف".

- ليك حق تحب يوم الأربع بصراحة، ومصممة إن معاذ صاحبك ظريف جداً، أما بالنسبة لمريم حاسة إنها اتسرعت شوية، كان ممكن تاخذ وقتها في إنها تطلع أجازة وتنسى العلاقة بالشغل شوية وبعد كده تاخذ خطوة إنها تلاقي نفسها، لكن تاني يوم تاخذ أجازة مفتوحة وعازية تنطلق هيكون صعب عليها جداً.
- بالعكس، ده أنسب وقت إنها تنطلق في وتدور على نفسها

وتكتشف حياتها، مريم العلاقة دي وضّحتلها هي محتاجة إيه وتعمله ازاى، مريم اختارت إنها تعيش حياتها بطريقتها وتدور على اللي يسعدها بنفسها مش بمساعدة أو اقتراح من حد، كان ممكن مريم تتأخر في القرار ده وترجع لنفس النقطة تاني وهي إنها تشتغل وتنسى تعيش حياتها، وتلاقي طنط ميرفت جاية عريس تاني ويحاولوا يقنعوها بي وترفضه وتعيد الموضوع كتير جدا بسبب إنها اتأخرت في إنها تاخذ قرار بإنها تعيش حياتها.

- جازيز، بالنسبة لإسلام ليه خبيت عليه إن كاميليا فشلت في علاقتها؟

- عشان الموضوع مش سهل، خوفت، ما تستغريش، خوفت لما إسلام يعرف يكلمها ويعترف ليها وهي ترفض أو بمعنى أدق تخاف، وقتها الموضوع هيكون صعب جدا على إسلام إنه يحاول بكل الطرق يثبت إنه فعلا بيحبها، وهي بسبب فقدان الثقة اللي حصل بعد علاقتها مش هتقدر تقتنع بسهولة، وممكن إسلام ما يفهمش ده ويستسلم للأمر الواقع ويمشي وكاميليا تخسر شخص بيحبها فعلاً.

- وممكن يتفهم الموقف ويستحملها ويكملوا سوا، ليه فرضت أسوأ الأحداث؟

- لأن كاميليا مش جاهزة تخوض تجربة ثانية بالسهولة دي، مش هيكون سهل أبداً إقناع كاميليا بالفرصة الثانية وخصوصاً إنها استنزفت كل مشاعرها وطاقاتها في الفرصة الأولى.

- فعلاً، دايمًا الشخص الصبح هو أكثر شخص بيتظلم في الحب، بيظهر في الوقت اللي بنكون في مُرهقين ومُسْتَهْلِكين بكل حاجة جوانا ما بيكونش في حاجة نقدر نديها له ولا مشاعر ولا حب ولا طاقة ولا بيكون عندنا القدرة إننا نحاول نتمسك بي أساساً، هو الشخص اللي بيتعاقب على أفعال شخص تاني وبيتحمل النتيجة كمان، وبالرغم من كده بيستحمل وبيكمل وبيحاول يتمسك بالعلاقة لآخر لحظة، وأول ما بنفوق من الصدمة بمساعدته، بنبعد عنه بحجة إنه ما يستاهلش إننا نأذيه، مش قادرة أفهم العلاقة بين الشخص الصبح والظلم اللي بيتعرض له وليه بيظهر دايمًا في الوقت ده بالذات، حاجة غريبة؟

- ما بيكونش الشخص الصبح أو مش دايمًا بيكون الشخص الصبح، في ناس كل دورها في الحياة رفع الأذى عن ناس تانية، الشخص اللي بيظهر ده دوره في حياتنا، وأوقات كتير بيكون الشخص ده حد في حياتنا بقاله فترة طويلة وما بيتكلمش وأول ما نتجرح أو نتأذي بيظهر ويتكلم، ويستحمل ويساعدنا نعدي

المرحلة الصعبة وفعلاً ما بنكملش لأي سبب من الأسباب وبعد كده بنكمل حياتنا ندور على الشخص الصح الي يستاهل حبنا ومشاعرنا فعلاً، لكن وجود الشخص ده مهم جداً في حياتنا، عامل زي مُنقذ الشواطئ، بينقذنا من أوجاعنا وتعبنا.

- عندك حق، كمل؟

صحيت تاني يوم عملت كباية الشاي وفطرت كان يوم خميس واليوم ده يوم ما قبل الراحة الناس كلها بتحاول إنها تعديه بأي طريقة وبنص طاقتهم عشان يكونوا جاهزين ليوم الأجازة الي غالباً بيقضوه نوم. لبست قميص أبيض وبنطلون أسود كلاسيك ونزلت ركبت العربية ووقفت في إشارة روكسي العظيمة وبعد حوالي ٥ دقائق الإشارة فتحت وصلت الشركة كان في زحمة والشركة كلها متجمعة وفي احتفال بمناسبة وسألت معاذ:

- هو إيه الي بيحصل؟

- بنحتفل بخطوبة مراد وميرنا.

استغربت العلاقة لكن الحقيقة الاحتفال كان جميل ومبهج ومن غير أي اصطناع، الكل كان مبسوط من قلبه فعلاً ويمكن دي من أهم مزايا الأشخاص الي شغالين في الشركة؛ إنهم قلبهم

على بعض دايماً وواضحين في مشاعرهم وتصرفاتهم ما قدرش أقول إني اتعاملت مع جميع الأشخاص في الشركة لكن واضح من تصرفاتهم من سرعتهم بالاحتفال بأي مناسبة بتحصل لأي شخص بينا وبعد الاحتفالات والمباركات طلعت مكتبي مع معاذ اللي كان مبسوط جداً وكأنه هو العريس وقبل ما أسأله عن سبب فرحته الزيادة كان بدأ يحكي لي:

- الحب حلو أنا مبسوط ليهم قوي وبتمنى في يوم من الأيام أعيش اللحظة دي وتكون عن حب فعلاً.

- معاذ هو أنت إيه اللي ممكن تقدمه للبنت اللي بتحبك أو هتحبها؟

- الأمان والدعم.

- وتفتكر ده كفاية؟

- معرفش، بس أعتقد إن البنت محتاجة للأمان والدعم في تصرفاتها وشخص يصحح لها أخطاءها من غير نرفزة وعصبية، شخص يدعمها في شغلها في أحلامها ويساعدها على تحقيقها شخص يكون سند ليها.

- إيه ده أنت بقيت رومانسي كمان.

- بحاول.

كنت مبسوط وكان بقالي فترة كبيرة ما فرحتش بالشكل ده وبدأت أشغل وأنا جوايا طاقة، وما بين الخطط والإيميلات بيعدي يوم الشغل ولسه في حاجات كتير أعملها لميت حاجاتي وركبت الأسانسير ونزلت ركبت العربية وقعدت فترة في العربية بفكر هعمل إيه؟ أنا مبسوط ومش عايز أروح عايز أعمل حاجة، أقابل حد، وافكرت كاميليا وخطوبة مجدي وإحساسها في يوم زي ده، كلمت مريم ومصطفى وإسلام ولياء واتفقنا نتقابل، وكلمت كاميليا وكانت رافضة في الأول ولكن بعد إلحاح مني وإصرار وافقت، وبعد ساعة تقريباً كنت وصلت بيت كاميليا وكلمتها وعرفتها إني مستنيها وبعد دقائق نزلت كاميليا.

- على طول متأخرة! نفسي مرة تيجي في ميعادك.

- أنا آسفة.

- لا فكي كده احنا رايمين نتبسط ده الناس كلها مستنياكي يا نجمة.

ضحكت وقالت:

- النجمة انطفت.

ضحكنا وبدأت أتحرك وبعد نص ساعة وصلنا المكان في مصر الجديدة وكان من اختيار لمياء وكان شيك جداً وهادي وصلنا وكان الكل موجود وبعد السلامات وكلام كثير عن أحوال كل شخص فينا مريم طلبت إننا نلعب معها لعبة، ومصطفى وإسلام وافقوا قبل ما يعرفوا اللعبة عبارة عن إيه أصلاً،

ومريم بدأت تشرح اللعبة وكانت عبارة عن كل شخص هيقول ميزة أو عيب أو اعتراف لكل شخص فينا وكلنا وافقنا، وبدأنا نلعب وكانت البداية عند لمياء اللي اختارت تبدأ بيا وقالت:  
 - كل اللي قاعدين عارفين كل حاجة عنك مفيش حاجة جديدة ممكن أقولها لكن نفسك تستاهل إنك تحاول عشانها.  
 - هحاول يا لمياء.

وكملت كلامها لباقي اللي قاعدين وبعد ما خلصت كان الدور على مريم اللي بدأت كلامها بكاميليا لكن كان أهم حاجة كلامها لمصطفى:

- مشاعرك هتتجدد مع الشخص الصح هتلاقي نفسك من غير ما تحس بتروح للشخص ده وترمي كل همومك عنده، هتلاقي عنده الأمان والراحة والحب، هتلاقي العوض لكن ما

تستعجلش.

مصطفى اكتفى بابتسامة وكملت مريم كلامها والدور عدى عليا وما كنش في أي حاجة جديدة في كلامي لأي شخص فيهم، والدور وصل لكاميليا اللي اكتفت بإنها تتمنى أمنية لكل شخص فينا ووصلنا لإسلام واللي قرر يبدأ بكاميليا وقاها:

- بحبك يا كاميليا.

صمت لمدة دقيقة كاملة وكمل إسلام كلامه:

- بحبك من أول مرة شوفتك فيها، حاولت ألاقي أي تفسير ثاني للي جوايا لكن مش لاقى، مش عارف أركز مع أي حد في القعدة غيرك، أنا وافقت ألعب؛ لأنني واخذ قرارى بإنى هعترفلك النهارده بإنى بحبك بأي طريقة ومعنديش أي استعداد للتنازل عنك، أنا عارف إنك مرتبطة وأنا آسف في اللي بقوله بس مش قادر أكتم حبي ليكي أكثر من كده، أنا آسف.

إسلام كان بيتكلم وهو حزين، بيعترف وهو عارف إن اعترافه هيسبب مشكلة؛ لأن في اعتقاده إن كاميليا مرتبطة ودي كانت اللحظة المناسبة اللي أبلغ إسلام فيها الحقيقة.

- كاميليا مش مرتبطة يا إسلام.



الكل بصلي باستغراب إلا كاميليا الي كانت باصة لإسلام في  
ذهول تام وكملت كلامي:

- في إيه مستغربين ليه؟ كاميليا مش مرتبطة وخطوبة الي كانت  
مرتبطة بي النهارده على معيدة زميلته، وده السبب الرئيسي في إني  
أجمعكم النهارده إننا نكون جنبها ومانسيهاش لوحدها في يوم زي  
ده وأعتقد إن إسلام استغل الفرصة المناسبة الي يعترف بيها بالي  
جواه.

بعد ما خلصت كلامي الاستغراب اتحول لفرحة وسعادة  
وإسلام من بعد ما كان حزين الفرحة كانت واضحة في عيونه  
وهو شايف كاميليا قدامه وإنه بعد ما كان مستحيل إنها تكون معاه  
دلوقتي الوضع اتغير وحلمه ممكن يبقى حقيقة، وكلنا كنا مستنيين  
رد كاميليا الي الدموع بدأت تبان في عنيتها لكنها كانت ماسكة  
نفسها وقالت:

- مش عارفة الصدفة بتلعب دورها ولا ده القدر، لكن الأكيد  
إن ربنا بيحبني إنه بيعتلي صديق يكون فاكرني ومايسبنش في حزني  
لوحدي ويحاول يبسطني من غير ما أطلب منه، وفي نفس الوقت  
يعتلي شخص أكون شايفة الحب في عنيه ويعترف لي بي وهو عارف  
إن ممكن ده يعمل له مشكلة كبيرة أو ممكن ردة فعلي تكون مش

مناسبة ولكنه مهتمش بكل ده وهدفه إنه يعترف بحبه، ده شخص مقدرش أقوله أي حاجة غير إني موافقة أخوض التجربة.

رد كاميليا فرحنا كلنا واتبسطنا ليهم جدًا وكملنا القعدة وبعد ساعتين من الضحك والهزار قررنا نمشي وإسلام وكاميليا طلبوا إنهم يكونوا مع بعض شوية ومشوا، ومصطفى طلب يوصل مريم وأنا وليماء اتفقنا إننا نتقابل بكرة ومشينا، وعلى الساعة ١١ بالليل وصلت البيت وأنا مبسوط جدًا باليوم الجميل ده ومكتتش عايز إنه يخلص وعملت كباية شاي وقعدت على السرير أقرأ وعلى الساعة ١٢ منتصف الليل كنت نمت.



- إيه اليوم الجميل ده، أنا اتبسطة جدا وكأني كنت معاكم، بس ليه استغربت علاقة مراد وميرنا؟

- هو كان تحفة الحقيقة، استغربت؛ لأن ميرنا ومراد على طول مختلفين في وجهات النظر وفي التحليل للمواقف مفيش تفاهم بينهم وما كنش في أي إحاء يقول إن في إمكانية وجود علاقة بينهم فجأة بيعلنوا خطوبتهم كانت حاجة غريبة بالنسبالي.

- غريبة فعلاً بس أوقات الاختلاف بيخلق الفضول إننا

نتعرف على مميزات الأشخاص الي بنختلف معاهم وعيوبهم وطريقة تفكيرهم وفي ظل رحلة الاستكشاف دي ممكن نقع في الحب.

- تفسير منطقي وعقلاني جداً وغالبًا ممكن يكون الأقرب.

- قول لي بقي أنت كنت مخطط إن إسلام يعترف لكاميليا؟

- نهائي أنا كان كل هدي نتجمع ونتبسط وأحاول أنسي كاميليا الي بيحصل على الجانب الآخر مش أكثر، وإسلام استغل الفرصة كويس جداً واستغلها صح.

- عندك حق، إيه الي حصل بعد كده؟

صحيت تاني يوم كان يوم جمعة ولسه سعادة يوم الخميس مسيطرة عليا كانت الساعة ١٠ الصبح عملت كباية الشاي وجهزت نفسي لصلاة الجمعة وبعد الصلاة فطرت وقعدت، وكان ميعادي مع لمياء الساعة ٤ العصر وأثناء ما أنا بتفرج على التلفزيون سألت نفسي ٣ أسئلة حاولت كتير أتجاهل التفكير فيهم وفشلت في كل المحاولات والـ ٣ أسئلة هما:

- أنا ليه حياتي وقفت؟

- محتاج إيه في حياتي؟

- هوصل للي أنا محتاجه ده ازاي؟

الحقيقة الأسئلة دي في ناس كتير غيري يبسألوها لنفسهم كل يوم والأغلبية ما حدش بيوصل لحاجة والأسباب كتير، الشغل، المسؤوليات، أسباب كتير جدا بتمنع الناس إنها تفكر في أي حاجة، فكرت كتير جدا في إجابة الأسئلة، لكن موصلتش لإجابة محدده وقررت أنسى أي حاجة بفكر فيها، وكانت الساعة ٣ العصر قومت ولبست تي شيرت أسود على بنطلون جينز، ونزلت ركبت العربية، وقفت في إشارة روكسي العظيمة وأنا بحاول أتجاهل التفكير في أي حاجة وقبل ما أبدأ أفكر الإشارة فتحت، وصلت قدام بيت " لمياء " ركنت العربية في أقرب مكان لقيته وطلعت خبطت على الباب وفتحتلي الباب:

- أنا قولت إنك نسيت العنوان وهتكلمني تسألني.

- مقدرش أنساه يا لمضة.

- أنا لمضة! ماشي، تعالى ادخل نتفاهم في الموضوع ده.

- متأكدة إنك مش وراكي حاجات مهمة زي ما قولتي لي؟

- وحتى لو ورايا، مش هيكون أهم منك، ها قول لي بقى مالك

احنا كلنا مبسوطين من اللي حصل امبارح طبعاً بس أنت عارف أنا

بركز في التفاصيل.

- أنا مش عارف ألاقي إجابة لأي سؤال في دماغي وأنتي الوحيدة اللي قادرة تساعديني، مش لأنك صاحبتني وبس، أنتي المراية اللي بشوف نفسي فيها وبتفهميني مش بحتاج أشر حلك كل حاجة.

- بتحاول تهرب من الأسئلة اللي بتيجي في دماغك وكالعادة عايزني أنا أجابوب عليها، ليه بتعاملني على إني جوجل؟  
- أنتي مش هتبطل هزار أبداً؟

- لا، مش هبطل هزار أبدا، بس ممكن نتكلم بجد شوية، احكي لي بقي.

- مفيش أي حاجة جديدة بتحصل في حياتي؛ واقفة تماماً وأنا ما بحاولش أعمل أي حاجة ومش عارف أنا محتاج إيه في حياتي وحتى لو عرفت مش عارف هوصل للي أنا محتاجه ازاي، من بعد موت أهلي حاسس إن كل حاجة انتهت، بقالي ٣ سنين في مكاني مش عارف أتحرك أو مش عايز أو ماعنديش طاقة، مش قادر أوصل لإجابة.

- استسلمت لصدمة وفاة أهلك وسببت نفسك للحزن

والضعف، حياتك مش واقفة، أنت ما بتحاولش، بتهرب من أي حاجة جديدة بتقرب منك عشان خايف تخسر تاني، خوفك قتل شغفك بكل حاجة بتحبها لدرجة إنك نسيت إيه اللي ببسطك ويفرحك، أنت محتاج حاجة واحدة بس؛ إنك تخرج من الدائرة اللي حبست نفسك جواها وساعتها هتلاقي نفسك وتقدر تبدأ حياتك من جديد.

(الكل شايف إني ما بخافش وإني قوي جدا وإني قدرت أتماسك وأرجع أقف على رجلي بعد موت أهلي، لكن لمياء الوحيدة اللي كانت عارفة إني خايف من الخسارة، كانت عارفة ومتأكدة إني مش هقدر أستحمل خسارة جديدة، الحقيقة إن لمياء كانت فهماني أكثر مني، لمياء التريموتر اللي بينبهنني إني لازم آخذ بالي)

- كان عندي حق لما قولت إنك السر اللي مخبيه عن العالم.

- وطول عمري هفضل السر ده واتأكد إني موجودة في كل وقت، بس لازم تجرب وتحاول تعيش من تاني، وابدأ اعمل كل حاجة أنت بتحبها.

- هحاول ومش هبطل محاولة غير لما ألاقي إجابة على كل أسئلتي.

- ولو احتجت اللمضة في أي وقت هتلاقيها.

- أكيد هحتاجك، ما ليش غيرك.

قعدنا نتكلم في حاجات كثير تخص شغلها وعن أحلامها وحكيثي عن فكرة فيلمها الجديد اللي هتبدأ تصويره والفكرة عجبتي وكنت متحمس أشوف الفيلم جدا ومنتظره، وبعد شوية مشيت وأنا جوايا حاجة واحدة بس؛ أكسر الدائرة وأخرج منها بأي طريقة وألاقي إجابة على أسئلي، وصلت البيت كانت الساعة ٩ بالليل غيرت هدومي وعملت كباية الشاي وقعدت على السرير ومسكت "النوت بوك" وبدأت أشخبط وأكتب أي كلام وبعد ما خلصت لقيت آخر جملة كتبتها:

{في بعض الأحيان نعتقد أننا ينقصنا الكثير، ولكن نحن لا ينقصنا شيء سوى أنفسنا.}

ما كنش صدفة نهائي إني أكتب الجملة دي وبالذات في التوقيت ده، كلام لمياء كان صح؛ أنا مش محتاج أي حاجة غير نفسي، أنا مفقدني جدا بعد تفكير ومحاولات لإيجاد حلول وبدون أي فائدة الساعة ١١ بالليل نمت، وعلى الساعة ١ بعد منتصف الليل جالي التيلفون المعتاد:

- خبطت مين يا معاذ؟

- ما خبطتش حد، أنا عايز أسألك سؤال؟

في اللحظة دي قلقت، أسئلة معاذ بتكون مخيفة وقاتلة بصراحة.

- اسأل يا معاذ، وربنا يستر.

- أنا ليه بخاف؟

اتصدمت من السؤال، معاذ كان لسه بيتكلم عن الحب فجأة بقى خايف وسكت وما كتتش عارف أردّ، لأول مرة أكون عاجز عن الرد على أسئلة معاذ، أنا كمان خايف ومش عارف الإجابة، سكت كثير لدرجة إن معاذ افكر إني قفلت.

- آلووو، أنت معايا؟ ما بتردش ليه؟

أخذت نفس عميق ورديت عليه:

- معاك يا معاذ، بنخاف عشان احنا بشر ولازم نخاف، الشخص الي ما بيخافش بيكون مريض ولازم يتعالج، الخوف شيء أساسي في حياتنا وكلنا بنخاف.

- بس أنا بخاف من كل حاجة، أنا بخاف من نفسي، ده طبيعي؟

- لازم تجرب تواجه يا معاذ، لازم تجرب الحاجات الي أنت



خايف منها وتعيشها وتتعلم منها، لازم تاخذ الخطوة الأولى.

- مش هقدر، مش عايز أخسر، أنت استحملت إحساس الخسارة وقاومتها، أنا مش هقدر أقاوم مش هقدر أستحمل الخسارة أنا واقف على البر عشان مش عايز أغرق وأنا مجربتش أعوم قبل كده ولا حاولت، أنا مش ضعيف أنا بخاف من المواجهة والخسارة، طول الوقت شايف اللي حواليا بيعانوا من الخسارة وفقدان الحاجات اللي بيحبوها، أنا مش هعرف أستحمل ده.

- بس ده لازم يحصل، قانون الحياة، حاجة قصاد حاجة، مفيش حد بياخد كل حاجة من غير ما يخسر أي حاجة، ولو حاولت تعمل عكس كده هتتحول لشخص أناني وفي الآخر هتخسر كل حاجة، وطول ما أنت خايف بتخسر؛ بتخسر قعدة حلوة، بتخسر شخص ممكن يكون بيحبك بجد، بتخسر سفريه حلوة، بتخسر لحظات حلوة كان ممكن تعيشها، بتخسر حاجات كتير مش هتبان ليك دلوقتي بس هتندم عليها بعدين وهتحس قد إيه خوفك خسرك حاجات كتير من غير ما تحس.

- أنا لما بكلمك وأخذ رأيك في حاجة مش عشان أنا مش عارف، لا، أنا بكلمك عشان أنت أعقل مني وأنا ببق في قرارك وبتفكر بالمنطق والعقل، أنا بخاف أخذ قرار ويطلع غلط وأخسر وأندم، أنا

عايز أرتبط وأتجوز، لكن أوقات بخاف من المسؤولية وأخاف أكون مش قدها، أراجع عن قراري، حياتي متلغبطة بسبب الخوف.

- ومفيش مفتاح سحري يا معاذ هيفتحلك أبواب السعادة وأنت خايف، جرب تواجه خوفك وتعمل الحاجات اللي بتخاف منها، جرب تحاول تتعرف على ناس جديدة، استمتع بحياتك وبكل لحظة فيها، الموضوع مش سهل ومش بسيط نهائي، لكن يستاهل إنك تحاول وتقاوم الخوف والخسارة.

- مش متأكد إنني هقدر أنجح في ده، بس هحاول؛ لأنني مفيش قدامي أي حلول تانية.

- وإيه المشكلة لو فشلت مرة، جرب تاني وتالت وعاشر، جرب لحد ما تنجح المهم ما تزهقش.

- هجرب أكيد.. شكرًا.. سلام.

- العفو، سلام يا معاذ.

قفلت مع معاذ وبفكر في الحل اللي نقدر نقتل بي الخوف اللي جوانا، افكرت الجملة اللي كتبتها واكتشفت إن السلاح اللي بيقتل الخوف هو " احنا "، الخوف بيفقدا نفسنا وييملك منا ويحركنا وفي لحظة ما بنزهق من خوفنا وبنحاول نتخلص منه، وأول خطوة

بنحاول نعملها عشان نتخلص من الخوف هي إننا " بندور " على نفسنا، احنا السلاح الي قادر يحارب الخوف، لكن السؤال الأهم: " نوصل ازاى للسلاح ده؟ "، وقبل ما أحاول أجاب على السؤال كنت نمت.

\*\*\*

- الإحساس القاتل كالعادة؛ الخوف، صعب قوي تواجه الإحساس ده لوحده، فكرة المواجهة معاه نفسها صعبة مش سهل أبداً إنك تواجه الحاجات الي كنت بتخاف تعملها، الشعور بعدم الأمان وأنت بتواجه الحاجات دي صعب وممتع الحقيقة بالرغم من صعوبة المواجهة لكنها ممتعة فعلاً وبنقدر نكسر من خلالها حواجز كثير جدا مش حاجز الخوف بس، مش مستغرب كلامك مع معاذ وإنك بتنصح يواجه وأنت نفسك خايف؟

- درجات الخوف متفاوتة، أنا خسرت وواجهت وقاومت وبنسبة كبيرة قدرت أتخطى حاجز الخوف مرة، مش هيكون صعب عليا أواجه مرة ثانية وثالثة وعاشرة، لكن الأكيد إني لازم أنجح، معاذ خايف لمجرد إنه شاف ناس بتخسر لكن مجربش إحساس الخسارة أو المكسب، معاذ زي ناس كثير جدا محتاجين الدفعة الأولى، محتاجين الي يخلق ليهم دافع وتحدي يقدرؤا من خلاله

إنهم يثبتوا أنفسهم وده الي حاولت أعمله مع معاذ.

- خوفت معاذ يفشل في إنه يستغل الدافع ده أو ما يقدرش يثبت نفسه وخوفه يهزمه؟

- كنت مرعوب بصراحة، معاذ حكمه على الأشياء سريع جداً لو احتمالية الفشل ظهرت في المحاولة هيستسلم وهيفشل فعلاً ومش هيحاول تاني وإقناعه إنه يستمر في المحاولة حتى لو كانت نهايتها الفشل كانت صعبة.

- يعني معاذ نجح من المحاولة الأولى؟

- مش بالظبط، لكن حصلت حاجات كتير غيرت تفكير معاذ.  
- إيه الي حصل؟ كمل.

صحيت تاني يوم وطبعاً يوم السبت زي ما شرحت قبل كده مش مفهوم لبست ونزلت وركبت العربية ووقفت في إشارة روكسي العظيمة وبعد حوالي ٣ دقائق الإشارة فتحت ووصلت الشركة ركنت العربية وركبت الأسانسير وطلعت مكتبي وسلمت على معاذ من بعيد لبعيد لتفادي مشاكل الجيل الخامس الي بضيعلي نص اليوم ودخل عم ربيع:

- تشرب حاجة يا أستاذ؟

- قهوة مضبوط يا عم ربيع.

- عنيا حاضر.

وما بين الإيميلات والخطط كنت خلّصت شغلي ولسه في حاجات كتير أعملها تاني يوم، لكن المكتب في حاجة غريبة؛ معاذ ساكت وقبل ما أخرج سألته:

- أنت ساكت ليه يا معاذ؟

ابتسم ابتسامة خفيفة وجاوب:

- أنا فكرت في كلامك عن المواجهة وقررت أواجهه، وأول مواجهه كانت مع شروق ورفضتني.

- ده طبيعي يا معاذ، ما تستغربش أنت ما بتحبهاش، شروق كانت مجرد اختيار من الاختيارات المتاحة قدامك وأنت واجهتها بعد ما فاضلت بينها وبين غيرها ولقيت إنها أنسب واحدة بينهم.

- أنا متلغبط مش عارف أفهم أنا عايز إيه ولا بحب مين ولا فاهم مشكلتي فين.

- مشكلتك إنك عايز ترتبط وخلاص من غير أي مشاعر تجاه اللي هتكون معاك، الحب مش بالطلب يا معاذ، هو بيحصل بدون

أي مقدمات وممكن تكون بتحب لكن بسبب تسرعك مش واخذ بالك وممكن يكون لسه ما شوفتش اللي تخطفك.

- يعني أنا ممكن أكون بحب حد بس مش عارف هو مين؟

- ممكن، حاول تهدى يا معاذ وشوف الدنيا حواليك ما تفكرش في حد بعينه وسيب نفسك وشوف اللي هيحصل.

- هحاول.

- سلام يا معاذ أشوفك بكرة.

- سلام.

سببت معاذ ونزلت وأنا مبسوط جداً إن معاذ خد الخطوة الأولى وركبت العربية وبعد حوالي ساعة كنت وصلت البيت وطلعت غيرت هدومي وعملت كباية الشاي وفتحت اللاب توب وبدأت أتابع الأخبار على "الفيس بوك" وفي وسط الأخبار وتغير سياسات الدول في التعامل مع بعضها لفت نظري "بوست" كاتبه أحد أصدقائي؛ "أسامة المحفوظ" وهو دكتور أمراض نفسية وعصبية وكان كاتب:

"في بعض الأحيان عدم الوضوح في التفكير أو التكلم ليس بسبب حدوث شيء خاطئ ولكن هو من أعراض الاضطراب

النفسي".

بدأت أبحث في الموضوع وأقرأ عنه وعرفت معلومات كثير عن الاضطراب النفسي، وعلى الساعة ٩ بالليل جالي تليفون من مريم:

- أستاذ هاري بوتر لقيت نفسك ولا لسه؟

ردت بنبرة كلها ثقة:

- هلاقيها، أنا عايزاك في موضوع مهم.

- خيرا مريم؟

- لو أنا معجبة بشخص ينفع أنا اللي أقرب منه؟

- لا يا مريم.

- كنت واثقة من إجابتك، محتاجة حل.

- حب ولا مجرد إعجاب؟

- حب، هو أول حب في حياتي لكن قلبه متعلق بواحدة تانية لما بنكون مع بعض في مكان واحد ما بشوفش غيره، بطمن، بفرح زي الطفلة، بلاقي نفسي، حياتي بتتحول ١٨٠ درجة في اللحظة اللي بيكون موجود فيها، حاولت أمنع نفسي عن حبه ٣ سنين كاملين بحاول وفشلت، حسام كان شخص كويس لكن قلبي

رافض، مشكلتي كبيرة صح؟

كنت بسمع مريم بتركيز شديد وكنت مركز في كل كلمة بتقولها، إحساس كتم المشاعر صعب واستحمال إحساس زي ده لمدة ٣ سنين أصعب، أنا ومريم أصدقاء من ٣ سنين تقريباً كانت في آخر سنة في الجامعة وأنا كنت بحضر ماجستير في كلية تجارة وفي الوقت ده كان في إعجاب بيني وبين بنت صاحبة مريم واطعرفت على مريم من خلالها وبدأت مريم في محاولات تقريب المسافات بيني وبين صاحبها ولكن بعد فترة قصيرة فشلت العلاقة قبل بدايتها ولكن صداقتي بمريم بقت أقوى وبعد تخرجها ساعدتها في إنها تشتغل معايا في نفس الشركة اللي بأشتغل فيها، مريم متفوقة جداً وذكية وسريعة التعلم ودمها خفيف وفي خلال سنتين وبمجهودها وبشهادة الجميع في الشركة قدرت تكون المدير المالي للشركة رغم سنها الصغير لكنها كان عندها طموح ورغبة في النجاح في شغلها، لكن كان على حساب حياتها الشخصية وده كان سبب ظهور حسام في الصورة، وفي اللحظة اللي قررت مريم تحكي عن حب حياتها قدرت أفهم إنها كانت بتهرب من حبها في حياتها العملية ولكنها فشلت...

- حل مشكلتك كاد يكون مستحيل يا مريم، إلا في حالة واحدة



وهي عدم وجود البنت الي هو متعلق بيها.

- والبنت مش موجودة فعلاً.

- مش فاهم؟

- البنت كانت موجودة فعلاً ولظروف ما انتهت علاقتهم،

لكني مش عارفة لسه موجودة جواه ولا مش موجودة برضو؟

- محتاجة تتأكدي إذا كانت موجودة ولا لا؟

- بالظبط كده والموضوع صعب جداً.

- هو فعلاً صعب ومفיש غيرك هيقدر يتأكد من المعلومة دي.

- التأكد من المعلومة يكاد سهل شوية الأصعب الاعتراف

بحبي وأعرف هو ببيادلني نفس الشعور ولا لأ.

- لأول مرة أخاف أقول رأيي يا مريم فشل المواجهة بإحساس

الحب صعبة جداً.

- عارفة إن الحل صعب لكن مفيش أي حلول تانية والموضوع

محتاج شجاعة كبيرة جداً، وأنا لا أمتلك الشجاعة دي.

- يعني إيه؟

- يعني دي لعبة القدر، تصبح على خير.

- وأنتي من أهله يا مريم.

قفلت مع مريم وأنا عندي شعور بالإحباط تجاه مريم وعدم قدرتي على مساعدتها، لكن آخر جملة لمريم كانت صادقة فعلاً دي لعبة القدر مفيش حاجة نقدر نعملها إلا إني حاولت في التفكير لإيجاد ولو فكرة أقدر أساعد بيها مريم وبعد فترة قصيرة كنت نمت.

\*\*\*

- من البداية وأنا متعاطفة مع مريم وكنت واثقة إن في سر كبير في حياتها، وإحساسي صح الحب هو سبب ضعفها.  
- بس مريم مش ضعيفة.

- عدم تقبل مريم لحسام بسبب ضعفها داخلياً عن إنها تتجاوز الشخص الي هي بتحبه بالرغم باعترافها بإن حسام شخص كويس ومناسب وعريس ما يترفضش، إلا إنها بالرغم من المميزات الي شافتها في حسام لكن ما كنتش قادرة على تجاوز الشخص الي ساكن قلبها.

- تحليل منطقي وعقلاني، بس الي مش قادر أفهمه ازاي في خلال الـ ٣ سنين ما قدرتش تتجاوز الشخص ده؟

- الأمل ،حبها للشخص ده هو الدافع القوي ليها إنها تكمل على أمل الوصول لقلبه.

- ازاى قدرتي تفسري الموقف بالشكل ده مع إنك محضرتيش الأحداث؟

- لأن ببساطة البنات بطبيعتهم متشابهين بنسبة كبيرة في الحب بنختلف في المواصفات الي بتحتاجها كل بنت عن الثانية في الشخص الي هي محتاجاه.

- أعتقد إنه ممكن يكون تفسير منطقي؛ لأنني ما حاولتش أسأل مريم عن سبب تحمّل الفترة دي كلها.

- إيه الي حصل بعد كده؟

عدت الأيام ومحصلش أحداث مهمة في خلال الباقي من شهر يناير مجرد مقابلات بيني وبين مصطفى وإسلام وأيام روتينة في الشغل وكان عندي مساحة ووقت كبير أراجع نفسي وأحاول ألاقي إجابات لأسئلتني، وفي ظل بحثي ومحاولاتي اكتشفت إني في الاتجاه الخطأ، أنا شخص عملي جداً ومتفوق في عملي قياساً بالنجاحات الي حققتها في، لكن فاشل اجتماعياً في الفترة الأخيرة، بدأت محاولات لتصحيح مسار حياتي وحاولت أكون اجتماعي

وأخرج من الدائرة الي حابس نفسي جواها وعملت بنصيحة لمياء وقابلت ناس جديدة واتعرفت عليهم وكونت صداقات مع أشخاص مختلفين معايا في وجهات النظر والشخصية، والحقيقة إن ده شيء ممتع جدًا واكتشفت إنه بيدي للحياة طعم مختلف وروح مختلفة، لكن لسه في حاجة ناقصة مش قادر أوصلها بالرغم من محاولاتي العديدة وكانت نتيجتها الفشل الذريع وحكمي على تجربة خروجي من الدائرة المقفولة تجربة ناجحة جدًا وحكمي ونظرتي للأشياء اتغيرت بشكل كبير.

- وإسلام وكاميليا ومريم؟

- إسلام وكاميليا مفيش حاجة مهمة أكثر من إنهم قربوا من بعض في الفترة دي أكثر، أما بالنسبة لمريم كانت فترة صعبة جدًا عليها، محاولات عديدة لإيجاد حل للاعتراف للشخص ده بحبها، كلها كانت نتيجتها نتيجة واحدة وهي الفشل وأعتقد إنها كانت فقدت الأمل في الوصول للشخص ده.

- لسه مصممة إن قرار مريم بإنها تاخذ أجازة مفتوحة من الشغل وتنطلق بعد انفصالها عن حسام كان قرار غلط بنسبة كبيرة.

- قرار مريم ما لهوش علاقة بانفصالها هي كانت محتاجة

تلاقي نفسها، السبب الحقيقي هو الخوف، مريم بسبب خوفها بعدت الشخص ده عنها.

- مش فاهمة ده حصل ازاي؟

- أقولك حصل ازاي...

\*\*\*

"فلاش باك من ٣ سنين وتحديدًا يوم ٢٨ يونيه ٢٠١٤"

قبل التاريخ ده علاقتي بمريم كانت تطورت جدًا وبقت أقوى وبتأخذ رأيي في حاجات شخصية تخص حياتها والحقيقة هي شخصية اجتماعية جبارة عندها القدرة على نشر طاقة إيجابية في أي مكان وفي أي علاقة أو أي قعدة ممكن تكون فيها، وحيث وجودها في حياتي بشكل دائم وبتكلم يوميًا وفي ظل تطور العلاقة بينا اتعرفت على لمياء وكاميليا ومصطفى وإسلام، والكل حب مريم وحب روحها، وجود شخص أصغر منك بطاقة المتفجرة وحبه للحياه وحبه للتجارب الجديدة وفي نفس الوقت قادر إنه يتفهم ويتناقش ويتكلم بعقلانية شديدة ده شيء رائع جدًا وده من أهم مميزات مريم، ده طبعًا بجانب زي ما قولت لك قبل كده ذكية وشاطرة وعلاقتها بباقي الأشخاص تطورت وقدرت تكون

صداقة قوية معاهم، لكن كان في شيء غريب مش مفهوم وهو  
علاقتها بمصطفى، وفي الوقت ده قررت أواجه مريم وطلبت  
أقابل مريم وأفهم منها،

- مريم ممكن أعرف طبيعة مشاعرك ناحية مصطفى؟

- بحبه.

- بس ده ما ينفعش يا مريم؛ مصطفى في حياته إنسانة بيحبها  
وناوي يتجوزها ظهورك أو محاولة إنك تبيني الحب ده خسرانة  
والمتضرر الوحيد هو أنتي.

- عارفة وما بحاولش أعمل كده بس لما بشوفه ما بقدرش أ منع  
نفسي، الحب مش بإيدينا.

- لأول مرة من يوم ما عرفتك أكون ضدك وضد اللي بتعمليله،  
أنتي مش فاهمة حجم المعاناة اللي هتكوني فيها لو مصطفى رفضك  
أنا خايف عليكي من إحساس العجز اللي هتكوني في وقتها.

- مع إن ده مش في إيدي، أوعدك إنني هحاول أ منع نفسي.

وبدأت مريم تخنفي واحدة واحدة ولما نتجمع تعتذر وده من  
غير ما تعرف أي شخص، سبب رفضها الحضور وهو إنها مش  
عايزة تكون مع مصطفى في مكان واحد في محاولة منها لمنع نفسها

وقلبها.

نرجع لليوم المطلوب وبعد اعتذارات كثيرة جداً من مريم  
أصرّت كاميليا في إنها تنزل وتجمع كلنا ومع إصرار كاميليا  
وافقت مريم واتقابلنا بالفعل وبنضحك وبنهزر وخلص اليوم  
عادي جداً بدون أي أحداث أو ده اللي توقعته وعلى الساعة ١٠  
مساء جالي مكالمه من مريم:

- خير يا مريم؟

- أنا خدت أغبي قرار في حياتي ومش عارفة إيه العواقب اللي  
ممكن تحصل.

- في إيه يا مريم مالك؟

- بعد ما خلصنا واحنا مروحين مصطفى طلب يوصلني  
ووافقت واتكلمنا مع بعض وكان مصمم يعرف أنا كنت مختفية ليه  
حاولت أداري كتير ومقدرتش واعترفله بحبي.

- ورد فعله؟

- مفيش حاجة، حصلت أكثر من ابتسامه وكمل كلامه عادي  
ولا كأني قولت حاجة، الغريب إن أنا مبسوطة وندمانه كان لازم  
مسمعش كلام كاميليا أنا ضعيفة جداً قدامه.

- ده القدر يا مريم.

- يعني إيه؟

- يعني اللي جاي مش بإيديكي يا مريم واللي خايفين منه حصل ولازم نواجه الأحداث الجاية سواء كانت حلوة أو وحشة.

- بالرغم من إني خايفة جداً ومرعوبة من اللي جاي، بس مطمئة بوجودك.

وانتهت المكالمة بينى وبينها وفي الوقت ده خدت قرار بإني مش هواجه مصطفى ولا هخليه يعرف إن أنا كنت عارف حقيقة مشاعر مريم تجاهه.

ومن بعد اليوم ده الجميع لاحظ تغير في طريقة تعامل مريم مع مصطفى، بتعامل بطريقة حادة وتجاهل واضح وصريح قدام الكل، كان تغير مفاجيء وغير متوقع على الأقل بالنسبالي، وبعد فترة فهمت منها إنها بتعمل كده عشان تبعده عنها عشان خايفة من إحساس الخسارة، الغريب إن مصطفى كان طبيعي جداً معها بالرغم من تصرفاتها الغريبة وكان دائماً يقولنا:

- عمري ما هزعل منها دي طاقة الشلة.

وبعد فترة حوالي سنة كان الموضوع اتقفل من تجاه مريم وركزت



في شغلها وبعد ٦ شهور انخطبت لحسام وبالشكل ده تكون قصة  
 مريم ومصطفى انتهت للأبد أو ده الي كنت متوقعه.  
 "رجوع لـ ٢٠١٧"

- الشخص الي مريم بتكلمك عنه يبقى مصطفى؟
- بالضبط.
- أنا مش قادرة أفهمك.
- ليه؟

- إسلام وكاميليا وفهمت وجهة نظرك مع إنه حصل وإسلام  
 واجه كاميليا ومرفضتش، ممكن تفهمني بالنسبة لمصطفى الي  
 طلب منك ترشحه بنت من أصدقاءك ورفضت تساعده وأنت  
 عارف إن مريم بتحبه؟

- في الوقت ده كانت مريم مخطوبة ومصطفى تحت تأثير صدمة  
 الفراق ومستحيل أجازف وأعرّف مصطفى بإني عارف موضوع  
 مريم، ولما طلب مني الطلب ده كان عايز يتأكد أنا عارف حقيقة  
 مشاعر مريم ناحيته ولا لأ بدليل إنه مجادلش معايا بعد رفضي طلبه.  
 - ورفضت إن مريم تعترفله هي بحبها ليه مع إن ده حصل قبل

كده؟

- أنا كنت رافض في الحالتين مع الاختلاف في الظروف، المرة الأولى كان في سبب واضح وصريح برفض مصطفى لمريم ورفضت بدافع خوفي على مشاعرها وعليها من الصدمة والشعور بالرفض، المرة الثانية حالتهم العاطفية مصطفى تحت تأثير صدمة الفراق ومريم مشوشة وخائفة ومش متأكدة ولو بنسبة كبيرة من مشاعر مصطفى تجاهها، مريم محتاجة الشخص الي كتمت حبه في قلبها ٣ سنين ومصطفى محتاج حد يعوضه عن الإنسانية الي كانت موجودة، أعتقد إن العلاقة عمرها ما هتنجح بالشكل ده.

- في الأغلب معاك حق؛ لأن احتمالية فشل مريم في تعويض مصطفى عن الإنسانية دي كبيرة وده ؛ لأننا كبنات ما بنحبش نتقارن ببعض وخصوصاً لو ده مع الشخص الي اختارنا نكمل معاه حياتنا في الوقت ده بنختار إننا نتقبل بشخصيتنا زي ما هي وبنرفض أي محاولات للتغير من الطرف الآخر لمجرد إننا بنقتنع إنه عايز كده عشان نكون نسخة من الشخصية الي هو عايزها وده مرفوض عندنا كبنات رفض قاطع ومفيهوش نقاش.

- والرغبة بتقل بمجرد ما بنفوق من الصدمة بنبدأ نشوف القرارات الي خدناها في حياتنا وبنكتشف إننا مخترناش العلاقة

دي، احنا كنا محتاجينها لفترة معينة وبعد كده خلاص ونبداً نقيم العلاقة؛ احنا محتاجين نكمل فيها ولا لا، أسباب كتير جداً كانت سبب في رفضي لمحاولة مريم بالاعتراف بحبها والحمد لله إني قدرت أمنعها، كانت فترة صعبة جداً عليها وعليها، لكن نجاحات الأشخاص الي حوالينا ونجاحاتنا في حاجات تانية كانت بتتهون كتير من الفترة دي.

- إيه هي النجاحات دي؟

بعد فترة صعبة خلال شهر يناير وفي يوم ٣ فبراير ٢٠١٧ جاتلي أهم دعوة في حياتي؛ " دعوة حضور عرض فيلم لمياء وكان يوم ٦ فبراير ٢٠١٧ " فرحت جداً وكلمتها:

- دي أهم وأعلى دعوة جاتلي في حياتي.

- ولسه لما تتفرج على الفيلم أكيد هتتسط.

- أنا متحمس للفكرة من يوم ما قولتي لي عليها.

- بس الفكرة ما كانتش كاملة، كان فيها جزء تعمدت أخفيه وأعمله مفاجأة.

- أنا مؤمن بيكي وبأفكارك ومتأكد إنها هتعجبني.

- عايزة أطلب منك طلب؟

- اتفضلي.

- خليك دايما في ضهر معاذ وجنبه، أنت عارف هو بالنسبالي إيه وبالرغم من وجودي في حياته إلا إنه بيحبك وبيثق فيك وفي رأيك، خليك جنبه وما تخذلوش، هو محتاجك أنت أكثر من أي حد الفترة دي، ممكن؟

- أكيد أنتي عارفة أنا بحب معاذ قد إيه وعموما أنا معاه وجنبه؛ لأن مش هلاقي حد في الدنيا يطلع عيني زيه.

قفلت مع لمياء وأنا مستغرب طلبها جداً، وفي نفس الوقت كلامها قلقتني على معاذ، وبعد تفكير كثير في الأحداث الأخيرة واللي بيحصل حواليا كنت نمت.

- لمياء تعرف معاذ؟

- أها.

- ليه بتطلب منك كده واشمعنا معاذ بالذات؟

- لمياء عندها ٢٦ سنة والدها اتوفى وهي عندها ١٨ سنة قبل دخولها الجامعة وأنا ولمياء أصدقاء من ١٦ سنة من صغرها وهي

متعلقة بالإخراج والكتابة وبتحب دايا تحول القصص والحكايات لأفلام ومسلسلات من صغرها وفي المدرسة كانت شاطرة جدًا في توزيع الأدوار في المسرحيات وكتابة السيناريو بطريقة مبسطة سهلة الحفظ، وفي الثانوي بدأت تدور على أماكن تعليم إخراج وكتابة سيناريو بشكل محترف إلا إنه والدها كان رافض بشدة ووعدا لما تخلص الثانوي وتجب مجموع كويس هيسمح لها تروح وبالفعل ده اللي حصل، لكن والدها اتوفى ومن حزنها الشديد قررت تأجيل خطوة إنها تروح مكان وتتعلم الإخراج وكتابة السيناريو إلا إن لعب القدر دوره وبعثلها كلية إعلام جامعة القاهرة وبالفعل دخلت الكلية وتفوقت خلال دراستها وأقنت الإخراج بشكل رهيب وده كان سبب في اختيارها إنها تكون مخرجة تحت التمرين مع أحد المخرجين.

- كل ده علاقته إيه بمعاذ؟

- العلاقة بينهم " مروه " أخت معاذ وصديقة لمياء المقربة طوال فترة الدراسة وبحكم صداقتهم اتعرفت لمياء على معاذ وبدأت علاقتهما لما كانت لمياء عندها فكرة ومحتاجة ولد يقدر ينفذها، وكانت كل الصفات تنطبق على معاذ عرضت الفكرة على مروه اللي بدورها ساعدتها في إقناع معاذ بتنفيذها ومع الوقت قدرت

لمياء ومعاذ ينفذوا أفكار كثير، لكن كانت المشكلة دائماً الخوف، معاذ كان حاسس طول الوقت إنه مش الشخص المناسب وخايف من الفشل وده السبب في إن ثنائية معاذ ولمياء في الإخراج والتمثيل ما تكملش بالرغم من إنهم قدروا يحققوا ٣ جوايز في ٣ مسابقات مختلفة للأفلام القصيرة ودي حكاية لمياء ومعاذ.

- وعلاقتك بلمياء كانت السبب في علاقتك بمعاذ؟

- كانت المفتاح، علاقة الصداقة بيني وبين معاذ بدأت في إحدى المقابلات بيني وبين لمياء، كان موجود وهنا اتعرفت على معاذ ومع الوقت وبحكم إننا نفس الكلية كنا بتتكلم كثير وبتتناقش في مسائل حسابية ولقيت إن معاذ عقلية عملية جداً وهادي وعنده خطط واستراتيجيات عمل متطورة بالرغم من سنّه الصغير وقبل تخرجه عرضت عليه يشتغل معاً في إدارة التخطيط بالشركة ووافق، ومعاذ شخصية كوميديا وكاركتير مختلف تماماً مشكلته الوحيدة أو السبب الرئيسي في قلقنا على معاذ الخوف وحكمه السريع على الأشياء والاستسلام.

- ومروه ليه مش بتساعده؟

- مروه التجوزت وسافرت مع جوزها بعد تخرج معاذ بسنة

تقريبًا وهي أخته الوحيدة.

- عارف أنا متعاطفة مع معاذ من أول الحكاية؛ لأنه بالرغم من إنه عارف الي هو محتاجة مش عارف يوصله، الناس الي بيكونوا واقفين مكسوفين ياخدوا حقهم من الدنيا دول شخصيات غريبة بيدوا كل حاجة حقها وعند حقهم هما بيخافوا ياخدوه مش قادرة أحدد سواء هما صح أو غلط، الخوف واخذ جزء كبير من حياتهم ومن روحهم معطلهم عن حاجات كثير وخطط كثير هما بيحلموا بيها في خيالهم؛ لأن ده المكان الوحيد الي بيقدروا يحققوا في كل الي هما عايزينه من غير خوف ولا قلق، وأحيانًا في ناس بتخاف تسرح بخيالها بعيد عشان ما يتصدموش بالواقع الأليم، إحساس الخوف مشكلة أزلية ومدمرة؛ الخوف من الفشل، الخوف من الرفض، الخوف إننا نتكلم، الخوف من الواقع، الخوف من الخيال، الخوف مرض أعتقد مَلُوش علاج إلا بالخسارة، لازم نواجهه ونخسر وساعتها يا نخاف أكثر يا نحاول تاني لحد ما نتخلص منه.

- في يوم من الأيام شخص قال لي جملة: "مش هبطل محاولات إني أكون أقوى".

- كانت في اليوم الي خسرت في أعز أصدقائي وبعد مناقشة طويلة بينا كانت دي آخر جملة قولتها ليك وكانت آخر مناقشة

بيناً؛ لأنك اختفيت بعدها بدون أي سبب، وأعتقد إن ده الوقت المناسب الي أعرف في السبب.

- لسه مهمة تعرفي السبب بعد ٧ سنين؟

- لو بعد ١٠٠ سنة هفضل مهمة أعرف ليه خذلتني، ليه معرفتنيش، مصعبتش عليك ثانية، ليه فكرت في نفسك وبس؟

- أنا آسف، عارف إنها كلمة مستفزة وملهاش لزمة؛ لأنها مش هتصلح حاجة، ٧ سنين خايف أقابلك، بتجنّب كل الأماكن الي ممكن أقابلك فيها حابس نفسي في دايرة عشان حاسس بالعجز، قدرت أخطي موت أهلي قدرت أخطي فشلي في محطات كتير في حياتي إلا أنتي، يوم ما نتقابل نكون في أكثر مكان أنتي بتخافي منه تفكري صدفة؟

- مفيش حاجة بتحصل صدفة، كل حاجة ليها سبب كله متقدر وبالتالي.

- عندك حق، القدر الي عُمرنا ما هنقدر نهرب منه، أنا الشخص الوحيد في العالم الي عمرك ما توقعتي إنه يخذلك بالرغم من إنك كتتي متأكدة إن النهاية بينا هتيجي، لكن عمرك ما توقعتي تكون بالشكل والتوقيت ده إحساس إنك تتسابي في وسط الطريق



لوحذك صعب وإحساس تحمل الخسارة أصعب، كنت أنا في وضعيف مقدرتش أواجهك بإني هخون ثقتك فيا، ثقتي في نفسي اتهزت، احتياجك ليا بيزيد، ما كنتش هعرف أكون جنبك ما كنتش هقدر أساعدك تبقى أقوى كنت هكون سبب ضعفك، ٧ سنين حاولت أخطاكي بكل الطرق الممكنة مقدرتش أخطاكي، ازاى وأنتي الطفلة اللي بتنور حياتي بضحككتها وشقاوتها وروحها؟ أنا آسف.

- أنا مش زعلانة برغم السنين دى كلها وإنك سبتني لوحدي أواجه العالم اللي أنت عارف إن أنا بخاف منه، بس عمرى ما زعلت منك، كنت فاكرة اختفائك هيدمر حياتي وصعب أثق في حد تاني لما أكثر شخص وثقت في وعارف إن أنا بهرب لي من العالم كله قرر إنه يخذلني هثق في مين تاني، الغريب إن أنا واجهت واشتغلت ونجحت بسببك، أنت الشخص الوحيد اللي وجودك كان ييقويني وفي عدم وجودك بقيت أقوى، تأثيرك في حياتي مهم جدًا حتى لما كنت سبب أذى ليا.

- أعتقد سواء وجودنا أو عدم وجودنا في حياة بعض مؤثر لينا احنا الاثنين.

- عندي نفس الاعتقاد، وعندي سؤال مش عارفة إجابته: "

مش قادرة أعرف أنت بتدور على إيه لحد دلوقتي؟".

- نكمل بقية الحدودة وهتعرفي.

- نكمل.

يوم ٥ فبراير ٢٠١٧ قبل ميعاد حفل العرض الأول لفيلم لمياء بيوم واحد كان يوم الأحد وبعد انتهاء يوم العمل الروتيني كالعادة وصلت البيت الساعة ٧ مساءً واستلمت من "عم وجدي" حارس العقار ورقة.

- إيه ده يا عم وجدي؟

- معرفش يا أستاذ في ست قالتلي أسلمك الورقة دي في إيديك.

- ومين الست دي؟

- كل اللي قالته "إنها محتاجة إنك تقرأ الورقة دي بس".

- شكرا يا عم وجدي.

طلعت شقتي ودخلت وقبل ما أعمل أي حاجة بدأت في إزالة التغليف المبهر للورقة، الحقيقة ممكن نعتبره جواب لكن تغليفه مش ظرف معرفش بصراحة المادة اللي كان متغلف بيها الورقة وبعد فتحها شعرت "باللاشيء" العالم تجرد بالنسبالي، انهار جميع

الدفاعات الي كنت محاوط بيها نفسي متفادياً بيها هجمات العالم الخارجي، شريط ماضي ٨ سنوات مر من أمامي في لحظات، ليه افكرتني بعد السنين دي كلها أنا لسه فاكّر نص الجواب وكأنه أمامي حالياً:

"أنا سارة إبراهيم، مش عارفة إحساسك هيكون إيه لما تشوف اسمي بعد السنين دي كلها، لكن الي متأكدة منه هو إنك تسأل نفسك: أنا ليه بعثلك في الوقت ده؟ وأنا هجاوبك، الخسارة مهمة جداً في حياتنا بتعلّمنا ازاى نصلح أخطاءنا ونتعلم منها تصحيح المسار ونمشي في طريق النجاح كالعادة، حياتي كلها عبارة عن خسائر متكررة بدون نجاح، وعلى الرغم من كل الخسائر دي أنت الوحيد أعظم خسارة حصلت في حياتي، عارفة إنه مكشش ينفع نكمل وعارفة إنه مش غلطك وعارفة إننا ما ينفعش نرجع والأسباب خارجة عن إرادتنا. ٨ سنين و ٤ شهور ١٣ يوم بحاول أبعثلك الكلام ده وفي الآخر موجود بين إيديك وفي الوقت المناسب، مش طالبة تسامحني لكن مفيش مانع لو حصل، ولو محصلش مش هبقى زعلانة منك؛ لأنه حقك، أنا دايمًا في احتياجك أتمنى إنك تكون موجود وقت انهيارى؛ لأني متأكدة إنك الوحيد الي مش هتخذلني، بشكرك على الأيام الي قضناها سوا وفرحت

فيها من قلبي وعمرى ما هعرف أفرح زيتها تانى إلا بوجودك، وأنا هختم كلامى بجملتك الشهيرة: " نحن على ما يرام مادام يسكن فى قلوبنا من نحبهم " .

سنين بحاول أواجه العالم كله وأنا كاتم جوايا أحلى ٣ سنين قضيتهم فى حياتى وقرار إنهاءهم ما كنش باختياري ولأنه مش اختياري قررت إن أنا أحتفظ بيهم جوايا فى ركن مستحيل حد يقرب منه؛ جزء مكتوب عليه ممنوع العبث، ممنوع محو أى شىء من تلك الذكريات، ممنوع محاولة أى شخص لجعلى أتناسى أى جزء منها، سنين قافل على نفسى فى محاولة منى لعدم الانبيار، سنين انهارت فى جزء من الثانية بمجرد ما قرأت اسمها، معرفش عدّى وقت قد إيه وأنا بفكر فى إجابة الأسئلة اللى بتدور جوا دماغى والذكريات اللى بتهاجمنى واحدة تلو الأخرى، معرفش إذا كنت لقيت إجابة لأى سؤال أو لا وفى النهاية نمت.



- الركن اللى جواك اللى فشلت أو وصله أو أفهمه؟

- كنت مقدّر محاولاتك ومجهوداتك فى الوصول وتمسكك بيا، وده مش فشل منك هي الوحيدة اللى كانت قادرة على اختراق كل

الدفاعات اليي قدرت أكونها لحماية الجزء ده مني .

- ليه؟

- ببساطة؛ لأن دي كانت أفضل نسخة مني .

- في كل مرحلة بنوصل لأفضل نسخة تمثلنا، ومع اختلاف الأحداث والتطور الطبيعي للحياة والسن وتراكم الخبرات بتتغير إلى نسخة تانية وفي اعتقادنا إن النسخة الماضية هي أفضل نسخة في حياتنا، وده مش حقيقي، شعورنا بإن الماضي أفضل؛ لأن بيكون جوانا مخاوف من المستقبل ودي طبيعة بني آدم كلهم؛ الخوف مما لا يعرفونه.

- جميل كلام الفلسفة وعلم النفس ده وأعتقد إنه صح بنسبة كبيرة، السبب في إن دي أفضل نسخة مني " الطاقة " كان عندي طاقة لكل جوانب الحياة حب - شغل - لعب - خروج - محاولة للنجاح - مواجهة الفشل - مواجهة الصعاب كل ما يحدث في حياتي كان عندي الطاقة الكاملة لمواجهته أو إنجازه ودي كانت النسخة الوحيدة الي وصلت بيها للمرحلة دي .

- إيه الي حصل بعد كده؟

صحيت تاني يوم متأخر على تليفون من معاذ وكانت الساعة

١٠ صباحًا

- صباح الخير يا معاذ.

- لسه نايم وعرض الفيلم باقي عليه ساعتين؟

- ساعة وهكون موجود في المكان، سلام.

قفلت مع معاذ وحاولت أتناسى الجواب وتجنب التفكير في أي حاجة، وبعد تجهيزات ما بعد الصبحيان من النوم قررت ألبس سيمي كلاسيك "قميص وبنطلون" وبدأت أتحرك وبعد نص ساعة كنت وصلت وكان الجميع موجود عدا لمياء، وبعد التحية والسؤال عن لمياء عرفت إنها بتجهز التحضيرات الأخيرة للفيلم وطلبت بمجرد وصولي أروح ليها غرفة الكنترول وبالفعل وصلت هناك:

- طلبتي لما أوصل أجيلك هنا ليه؟

- عشان اليوم ده خاص جدًا ليك.

- ليا أنا؟ ده عرض فيلمك أنتي.

- أعتقد إنك هتفهم كل حاجة بمجرد عرض المشهد الأول في الفيلم محتاجة منك وعد تكمل الفيلم للنهاية.

- مهما حصل ومهما كان مدى ارتباط الفيلم ده بيا أنا واثق فيكي

وأوعدك إني هكمله للنهاية.

حسيت بارتياح لمياء بعد ما وعدتها، الحقيقة لو حتى كانت المفاجأة إن الفيلم عن قصة حياتي أكيد مش هتكون أسوأ من الواقع الي أنا عشتة، بدأ العد التنازلي للفيلم والجميع في مكانه وبدأ عرض الفيلم...  
المشهد الأول..

شاب ينظر من النافذة ليس على الشارع أو البحر، إنها ينظر على أحداث حياته وبالتقرب من الأحداث التي ينظر إليها ذلك الشاب اتضح لي بأن هذا الشاب هو أنا.

انبهرت جداً من تسلسل أحداث الفيلم أو ممكن نقول بمشاهدة تسلسل أحداث حياتي أمام عيني وبما حدث بها، وما جعل انبهاري يزداد هو مشاهد علاقتي بسارة، كنت مبتسم طوال الفيلم مفيش حد يعرف إن القصة الي قدام عينهم دي هي قصة حياتي وبرغم استمتاعي الشديد بالفيلم إلا إني كنت منتظر مشهد إنهاء علاقتي بسارة وحابب أشوف لمياء هتنتهي العلاقة دي ازاي، اعتقدت إن المفاجأة هتكون في اختيار لمياء لسبب إنهاء العلاقة، لكن المفاجأة كانت أكبر بكثير مما كنت أتوقع وهي عبارة عن " فيديو تسجيلي

لسارة الحقيقية بتحكي في سبب إنهاء العلاقة "، وفي اللحظة دي عرفت معنى كلمة سارة " في الوقت المناسب " الي كتبتها في الجواب، لمياء عمرها ما فشلت تكون مصدر سعادتي وبعد انتهاء الفيلم وإشادة الجميع بمستوى الإخراج والقصة السيناريو والحوار والفيلم عموماً، برغم كل ده إلا إن لمياء كانت مستنية رأيي أنا بالذات دون الجميع، وسنحت لنا الفرصة إننا نكون لوحدنا عشان نتكلم:

- طبعاً متوقعة مني كلام كتير وأسئلة زي مثلاً أقنعتي سارة ازاي، لا مش هسأل؛ لأن إجابة السؤال ده كانت في الفيديو وقبلها كانت في الجواب الي وصلني امبارح ودلوقتي فهمت وصلني ازاي ومين الي سلّمه لعم وجدي وأقنعه مَيَقْلِش مين الي سلمه الجواب.

- أنا فعلاً الي سلمته الجواب وأقنعتة بالفعل ميقولش مين، أعتقد موهبة الإقناع عندي عاليه؟

- مش الإقناع بس يا لمياء أنتي موهوبة فعلاً في كل حاجة، شكرًا يا لمياء.

- أعتقد دلوقتي مفيش أسئلة ولا اضطرابات ولا دواير مقفولة.



- في سؤال واحد: إيه معنى اسم الفيلم " دائرة الخوف "؟

- لأنك عايز تتأكد من إنك فهمت الاسم وبالفعل أنت صح.

مرت الساعات ما بين التجهيز لمؤتمر ما بعد عرض الفيلم مرورًا بالمؤتمر وأحداثه اللي كانت مبهرة الحقيقة، متخيلة إنك قاعدة في وسط مجموعة من الناس بتتناقش وتسال وتقول رأيها في مشاعرك وأحداث حياتك وقصة حياتك وهما منبهرين بكل ده إحساس ما يتوصفش، يمكن الأحداث دي كانت صعبة في وقتها ويمكن ما تستحقش تكون قصة فيلم ويمكن حاجات كثير جدًا ممكن تخطر على بال أي حد بإن كلنا مرينا بظروف صعبة وفي ناس مرت بظروف أصعب وأصعب مليون مرة، الفكرة مش في المأساة اللي بنعيشها، الحكاية في المتعة في النهاية، في المشوار نفسه، تفكيرى اختلف كثير بعد الفيلم مش لأنه أثار فيا بل لأنه جاوبني على السؤال اللي معطلني آخذ خطوة في حياتي ومخوفني من العالم، كلنا جوانا جزء أو حاجة أو سؤال عايزين نتخلص منه بإننا نفهم، وسبب الاحتفاظ بالجزء ده إننا خايفين نخسر تاني؛ لأننا مش فاهمين احنا خسرنا ليه وبمجرد ما نفهم سبب الخسارة هتكون بداية الانطلاق من جديد، وبعد انتهاء اليوم والاتفاق على إننا يوم الجمعة هنتحتفل بالنجاح الكبير بتاع لمياء رجعت البيت وأنا جوايا طاقة للانطلاق

من جديد لكن لسه فاضل كام حاجة، وبعد شوية كنت نمت.

\*\*\*

- الأسئلة كثير جدًا في الجزء ده، خيلنا نبدأ بأهم سؤال: إيه سبب سارة لإنهاء العلاقة؟

- المرض، حكايتي أنا وسارة بدأت بتعارف عادي بين أي بنت وولد في إحدى المناسبات، عندها قبول غير طبيعي اتكلمنا كثير واتشدت ليها جدًا مكنتش مصدق فكرة الحضور الطاغي والروح الحلوة تغلب الجمال وكل الكلام اللي ممكن يتقال لما حد ما يكونش عارف هو عايز يفضل مع الشخص ده ليه، سارة جميلة ودمها خفيف وروحها لطيفة، لو حاولت أوصفها بكلمة واحدة هي مبهرة، مرت الأيام وأنا وسارة بنقرب من بعض أكثر وبعد سنة اعترفت ليها بحبي لكنها رفضتني، حاولت معاها كثير أعرف السبب وكانت بترفض وقدام إصراري قررت تقول لي؛ وهي إنها مريضة بمرض عضوي يمنعها من الأمومة ومش بيتعالج، قررت إن أنا أكمل معاها وهي رفضت كثير لكني كنت مصمم لحد ما قررت تخوض التجربة وفي خلال سنتين عشنا أجمل أيام حياتنا وفي خلال المدة دي مفكرتش نهائي في مرضها لكن هي ما كانتش قادرة تكمل وبعدت وانتهت أجمل ٣ سنين في حياتي.

- يعني أنت كنت عارف قبل ما تبعد إنها مريضة ورافضة العلاقة، أكيد بعدها هيكون لنفس السبب ازاى ما كنتش عارف السبب ومحتاج تعرفه؟

- لأن بعد ما قررت تبعد بسنة اتجوزت وحاولت أعرف منها ليه بعدت عني لكنها قفلت كل الطرق الي ممكن أقدر أوصلها بيها وما كنتش عارف ليه عملت كده.

- مش فاهمه حاجة.

- أفهمك؛ أنا وسارة علاقتنا كصدقة كانت رائعة، لكن علاقتنا كحبيين مش رائعة لعدة أسباب: أولها مرض سارة وإنها شايفة إن تمسكي بيها كجزء من الشفقة على مرضها، ثانيًا إن سارة بتحبني كصديق وكانت على مدار سنتين بتحاول تحبني كحبيب ولكنها فشلت، ثالثًا إنها حبت الشخص ده أثناء علاقتنا وما كانتش قادرة تواجهني وفي الوقت ده قررت تبعد بدون أي مقدمات وتنتهي علاقتنا.

- كان ممكن تفضل وترجعوا أصدقاء تاني.

- أعتقد إنك عارفة إن الصداقة ممكن تتحول لحب، الحب صعب جدًا يتحول لصداقة.

- للأسف عارفة، إيه اللي حصل بعد كده؟

"السادة الركاب سوف نصل طنطا بعد ١٠ دقائق وننطلق مرة أخرى بعد ٥ دقائق، وسنصل القاهرة بعد ساعة وأربعين دقيقة من الآن".

صحيت ثاني يوم وكان يوم الثلاثاء؛ يوم الروح الشريرة، لبست قميص وبنطلون ونزلت ركبت العريية ووقفت في إشارة روكسي العظيمة وبعد نص ساعة كاملة الإشارة فتحت ووصلت الشركة وعلى عكس الأيام الأخيرة لقيتها واقفة قدام الأسانسير:

- صباح الخير عامل إيه؟

- الحمد لله يا فريدة، أنتي عاملة إيه؟ وبعذرلك عن آخر مرة بس أتمنى تفهميني يا فريدة مش بإيدي.

- لا أنا تمام وتفهمت الموضوع وataأكدت إن الإنسان مَلوش دخل في متطلبات القلب، المشكلة في وجعه.

- شكرًا يا فريدة وبتمنالك الأفضل.

- أنا آسفة بس عندي سؤال.

- اتفضلي.

- أنت طلبت من معاذ يقرب مني؟

- معاذ! يقرب منك، مش فاهم.

- خلاص تمام وآسفة لو أزعجتك.

ومشيت فريدة وسابتني في وسط حيرة شديدة، وأنا بركب الأسانسير معاذ يقرب من فريدة ازاى؟ وليه لا؟ ومعاذ ما تكلمش معايا كالعادة ليه؟ كل دي أسئلة بتدور في دماغى في الدقيقة اللي بيستغرقها الأسانسير للوصول لمكتبي، وصلت المكتب وسلمت على معاذ من بعيد لبعيد لتفادي مشاكل الجيل الخامس اللي بتضيعلي نص اليوم، لاحظت في تغير في مزاج معاذ مش متوتر وهادي ومبتسم، من فترة طويلة مشوفتش معاذ بالشكل ده، هل ده القدر كالعادة يلعب لعبته وقطع تفكيرى صوت معاذ وهو بيكلمني:

- ليه مفكرتش تكمل حياتك مع لمياء؟

- نعم، بتقول إيه؟

- ليه مفكرتش تكمل حياتك مع لمياء؟ أنتو الاتنين متفاهمين وكل واحد فيكم فاهم احتياجات وعيوب الثاني يعني ظروف مناسبة للحب وبناء حياة جديدة؟

- مع إنه سؤال غريب شوية وخصوصاً منك أنت إلا إن إجابته

بسيطة مش عايزين نخسر بعض.

- عارف أنا قبل ما أشتغل هنا بدور على حاجات كثير وحد يكون جنبي أحبه ويحبني ونبني علاقتنا سوا ونكمل حياتنا، كنت بتمنى أكون زيك وألاقي حد زي لمياء ونكون متفاهمين للدرجة دي في الفترة الأخيرة وخاصة لما بدأت أتكلم معاك حول شريكة الحياة اكتشفت إن أنا ما ينفعش أكون زيك ولازم أكون أنا وده بسببك على فكرة، وقررت أواجه وأركز وأخسر وأكسب ومستسلمش، أكيد فاكسر شروق ونور اللي كنت بختار بينهم وفي الآخر اخترت واطرفضت، من بعد الحدث ده فكرت كثير ليه شاغل بالي وعمال أقارن وأختار وأشوف وأنا عايز حاجة مش معتمدة على العقل ولا التخطيط مرتبطة بقلبي، الحقيقة إن كل اللي أنا كنت بفكر فيهم وبتكلم عنهم ولا واحدة منهم كانت داخله قلبي، ومن هنا قررت أسيب الاختيار للقلب واستغربت من إن أكثر واحدة بتخانق معاها وبهاجمها بمجرد دخولها المكتب هي اللي في قلبي ومترددتش ومن ٣ أيام بس اعترفت ليها بحبي وقررنا نخوض التجربة أنا وفريدة.

- فريدة؟!

- اختيار صادم بالنسبالك بس أنا مبسوط يعني أفكارنا ونمط

حياتنا أهدافنا غالبا متوافقة وإضافة على كل ده بحبها.

- هو صادم بس أنا بتمنالك كل خير ومبسوط أكثر ليك أولا  
لاختيارك شريكة حياتك، ثانياً؛ لأنك قررت تواجهه حتى لو  
النتيجة الفشل.

- أكيد مش هبطل أزعجك بأسئلتني ومكالماتي لكن بشكرك  
إنك ساعدتني.

كنت مبسوط بشكل أكثر مما تتخيلي لمعاذ؛ هو مش مجرد  
صديق ليا أو زميل في الشغل وبس لا هو بالنسبالي أخ كسبته  
من الدنيا الي ما كنش مكتوبلي فيها يكون ليا أخ من أبويا وأمي،  
مبسوط لنجاحه للفرحة الي شايفها في عيونه، للراحة الي وصلها  
وكان أخيرا يوم التلات قرر إنه يكون روح جميلة وروح سعادة  
وبهجة وفرحة تدخل قلبي، ما بين الإيميلات والخطط والفرحة  
انتهى يوم الشغل وأنا لسه في حاجات كثير أعملها بكرة وخرجت  
ركبت الأسانسير ووصلت للعربية وكلمت مريم واتفقنا نتقابل،  
وبعد حوالي ساعة كنت وصلت المكان ودخلت ولأول مرة تكون  
متواجدة قبلي في المكان.

- مقابلات يوم التلات بتغيرك ولا إيه؟

- حاولت أعمل حاجة صح وأوصل قبلك مرة.

- قرارك إيه يا مريم؟

- مصطفى مش مجرد شخص بالنسبالي حبيته والظروف ما سمحتش نكون مع بعض وخلاص هنسأه لا هو بالنسبالي الأمان.

- ولو نفسيًا مش جاهز لو مش هيكون معاكي بكامل حواسه ومشاعره هترضي؟

- هرَضِي؛ لأنِّي بحبه.

- احسيها صح يا مريم.

- الحب المبني على الحسابات والمنطق خسران، الحب شجاعة الحب تمسك الحب ضد المنطق والظروف والناس، الحب قرار يا تكمل يا تقفل بابه وتستنى الترتيبات الخارجية تختارلك شريك حياتك وأنا قررت مش هقفل باب الحب ده حتى لو نهايته وجع.

- أنتي عارفة إنك بتحاربي في حرب مش مضمونة؟

- وهكسبها وقلبه هيكون ليا ومش ناوية أخسره مرة تانية.

اتكلمت مع مريم كتير وبعد حوالي ساعتين مشينا وأنا مبسوط من تحدي مريم لنفسها وللظروف وتمسكها بحبها، وبعد حوالي



نص ساعة كنت وصلت البيت وطلعت وعملت كوباية الشاي وقعدت على السرير أقلب في موبايلي والفيس بوك ومتابعة الأحداث ولفت نظري "بوست" لصديقي "فؤاد العزازي" وهو دكتور بكلية الزراعة جامعة عين شمس يقول: "دائماً ما تعطينا الحياة الفرصة الثانية وكأنها شيء مميز وهو أبسط حقوقنا بأن نحاول مرة أخرى، سواء في إصلاح ما أتلفناه أو النجاح فيما فشلنا فيه، لا تنتظر فرصة ثانية ولكن انتزع فرصك كلها عنوة عن الحياة".

وهنا افكرت إسلام ومعاذ ومريم وقصتهم وكل واحد فيهم فعلاً قرر ما يستناش الفرصة الثانية وقرر يحاول أيًا كانت النتيجة وأعتقد إنه شيء كويس جداً، وبعد شوية معرفش قد إيه كنت نمت.



- مبسوطه جداً لمعاذ ولريم، الحقيقة إن الأحداث بقت مبهجة ومفرحة على عكس الفترة الأولى وكأنكم كنتو مستنين فيلم لمياء عشان تنطلقوا.

- كل واحد فينا بيكون محتاج دفعة تخليه يكمل وينطلق ويقرر ويواجه وأعتقد إن فيلم لمياء كان هو الدفعة دي.

- بصراحة خوفي على مريم من الوجد ومن عدم تقبل مصطفى ليها.

- للأسف ده كان نفس سبب خوفي على مريم.

- يعني حصل فعلاً؟

- هتعرفي لما أكملك بقية الأحداث.

صحيت تاني يوم عملت كباية الشاي وفطرت ولبست تي شيرت أسود وبنطلون جينز ونزلت ركبت العربية وكان يوم الأربعاء وزي ما قولت لك بيكون يوم خفيف وغالبًا أحداثه بتكون لطيفة، وقفت في إشارة روكسي العظيمة وبعد ١٠ دقائق كانت الإشارة فتحت ووصلت الشركة وركبت الأسانسير ووصلت المكتب وسلمت على معاذ من بعيد لبعيد لتفادي مشاكل الجيل الخامس اللي بتأخذ نص اليوم ودخل عم ربيع وطلبت القهوة المطبوطة وبدأت أشتغل وأنا في دماغي شيء واحد وهو شكل حياتي الجاي هيكون عامل أزاى بعد ما كل حاجة بقت واضحة وقصتي القديمة انتهت مع رسالتها الأخيرة؟ في اللحظة دي قررت أجرب تجربة مريم والعائق الوحيد كان معاذ هل هيقدر يستحمل الشغل لوحده؟ هل هيكون قادر على تقبل شخص تاني يكون معاه في نفس المكتب لفترة مؤقتة؟

لكني ما حاولتس أتكلم معاه؛ لأنني ما كنتش عايز أغير قراري أو أجّله، واتجهت ناحية مديري واتناقشنا كثير جدّا، وبعد حوالي ٣ ساعات من البحث المتواصل عن حلول لعدم قدرتي على متابعة الشغل في ظل ظروف الحالية توصلنا لقرار إن معاذ هيكون هو مدير المكتب مؤقتًا؛ لأنه أدرى شخص بأحوال المكتب والخطط ودراستها مع إعطائه الصلاحية في اختيار شخص تاني من أي قسم لمساعدته في قسم التخطيط، وبعد إبلاغ معاذ بالقرار بدون أي تردد اختار فريدة وفي الوقت ده عارضت معاذ خوفت عليه:

- ما ينفعش يا معاذ، فريدة لأ.

- ليه لأ؟ أنا هعرف أتعامل معاها وهي عندها خلفية كويسة عن شغلنا وعن دراسة الميزانيات وتحليلها ووضع ميزانيات متوقعة للمشاريع الجديدة.

- علاقتكم الجديدة هتكون عائق بينكم يا معاذ، خايف ما تعرفش تفصل الشغل عن الحياة الخاصة.

- علاقتي بفريدة منفصلة عن الشغل، أنا قادر أحدد أنا فين وبعمل إيه.

- أتمنى يا معاذ.

- بالرغم من إني هفتقد وجودك كل يوم في الشركة وفي المكتب بالذات ومش متخيل إن أنا هكون مكانك وعلى مكتبك بتمنى ترجع في أسرع وقت؛ لأن دايباً محتاجك.

- أنا واخذ أجازة مش مهاجر، يعني ممكن نتقابل في أي وقت وفي أي مكان ولو احتجت حاجة أنا موجود.

- مش هناقشك في قرارك المفاجيء وبتمناللك الراحة والوصول لغايتك.

- شكرًا يا معاذ.

بدأت في جمع كل متعلقاتي بالمكتب وخرجت وأول شخص كلمته لمياء وبلغتها بقراري، وعلى عكس المتوقع فرحت جدًا وقالتلي إنها كانت منتظرة الخطوة دي من فترة طويلة، وواضح إن ظهور سارة في الصورة هيغير حاجات كتير وكان عندها حق؛ ظهور سارة في الصورة غير كل حاجة، إحساس الحرية بإنك مش مرتبطة بشيء أو مسجونة جوا ذكرياتك أو طول الوقت في صراعات مع نفسك في محاولات لحماية جزء منك، كل ده انتهى ولكن ما زال الخوف موجود، الشعور غير المفهوم سبب وجوده في كل مراحل الحياة وفي كل شيء ممكن نمر بي خوف من انتهاء

العلاقات، خوف من المستقبل، خوف من اختفاء الأمان، خوف من كل شيء، هل ده بسبب غريزة الإنسان أو طبيعته ولا بسبب فقدان الثقة في الناس وفي الحياة؟ والغريب إن في بعض الدكاترة النفسيين لديهم مصطلح الخوف الصحي وده شابه؛ لأنك تخافي تغلطي وبالشكل ده هتركزي عشان متغلطيش نقدر نقول زي ما أهالينا البسطاء يقولوا:

- اللي تخاف منه ما يحيش أحسن منه.

الناس القديمة دي غريبة ما وصلوش لكم العلم اللي وصلنا ليه حاليًا ولا عندهم التكنولوجيا الموجودة حاليًا ولكن لو نظرنا على كلامهم أو أمثالهم الشعبية القديمة هنلاقي لكل موقف أو شكل حياة في حياتنا الحالية مثل قالوه، أنا مش قادر أواكب تطور حياتي بالشكل اللي يخليني أتقبل العالم الحالي وده بسبب اختياري الدخول في دائرة مقفولة مغلقة بالخوف من كل ما هو جديد، وبعد ما انتهى الخوف وتم تدمير الدائرة بدأت المرحلة الجديدة وهو الخوف من الاصطدام بالعالم الخارجي.

وبعد محاولتي السابقة في الخروج من الدائرة اللي نجحت نوعًا ما بتعرفي على أشكال وأنماط حياة جديدة لبعض الأشخاص، ومن هنا جاء قراري الثاني وهو الابتعاد عن عالمي الحالي وعن الجميع

والبدء في البحث عن عالم جديد وحياة جديدة، ولكنني قررت التأجيل في الخطوه دي فترة، وبعد فترة من حالة السكون والتجول في شوارع القاهرة دون هدف رجعت البيت كانت الساعة ٧ بالليل وطلعت البيت عملت كباية الشاي ومسكت النوت بوك بتاعتي وبدأت أكتب بدون التفكير أنا بكتب إيه، وكتبت كتير وبرجوعي لقراءة ما كتبت لقيت كم كبير من المشاعر المختلطة وكم هائل من الأفكار والخطط المستقبلية وبعض الذكريات المريعة المتعبة، وفي النهاية تلخيصاً لكل الكلام الي كتبتة كانت آخر جملة أكتبها:

{ نهلك أنفسنا في الماضي ولن يعود ونتصنع عيش حاضرنا ولم نحضر }

وقفلت النوت بوك وأنا جوايا إحساس أول مرة أحسّه من سنين؛ السلام الداخلي، وفي اللحظة دي قررت أنام وأنا لأول مرة مش عندي أي ارتباطات، حاسس إنني حر، وبعد وقت قليل كنت نمت.



- لأول مرة أكون متلغبطة ومش عارفة أقول إيه، مش عارفة أفكر الأسئلة كتيرة لكن مش قادرة ابدء بأيه، ليه عايز تبعد

عن الي حواليك وليه قررت تأجل الخطوة؟

- سبب التأجيل ما كنش واضح، كان في حاجة جوايا بتقول لي مش دلوقتي لازم نصبر، أما البعد كنت عايز أراجع نفسي لوحدي عشان أقدر أحدد أنا عايز إيه من جوايا.

- وقدرت تعرف أنت عايز إيه؟

- لأ.

- وده كان سبب وجودك هنا إنك " تدور " على إجابة سؤال أنت عايز إيه؟

- ده سبب من أسباب وجودي هنا.

- يعني لسه في أسباب تانية؟

- بالظبط.

- احكي لي، الفضول بدأ يقتلني وأظن إنك عارف إن أنا فضولية جداً.

- هحكيلك.

عدّى يوم الخميس عادي جداً من غير أي جديد، بعض المكالمات مع بعض الأصدقاء والمحادثات مع لمياء على الواتس والتجهيز

معاهم في ترتيبات احتفال يوم الجمعة، الكل كان متحمس الحقيقة، نجاح لمياء المرة دي بالذات مختلف بالنسبالي على الأقل، ومر اليوم في سلام وهدوء وجاء يوم الاحتفال، يوم الجمعة صحيت قبل الصلاة بحوالي ساعة وبدأت في ترتيبات التجهيز للصلاة وصليت الجمعة وطلعت عملت كباية شاي وفطرت وبدأت في تجهيز لبسي ودي كانت أول مرة أهتم أنا هلبس إيه من فترة طويلة.

بدأت أخذ بالي من تفاصيل صغيرة في حياتي ما كنتش بعملها وجهازت قميص وبنطلون كلاسيك وكان باقي على الميعاد تقريباً ساعة أو أقل شوية بدأت في اللبس ونزلت ركبت العربية واخترت هدية بسيطة؛ عبارة عن تحفة فنية لمعرفتي بمدى تعلق لمياء بالأشياء دي ووصلت المكان قبل الميعاد بحوالي ٥ دقائق وكان معاذ وإسلام وكاميليا وفريدة آخر المنضمين حديثاً لمجموعتنا الصغيرة وكنا في انتظار مريم ومصطفى ولمياء، وبعد حوالي ٣ دقائق من وصولي وصلوا الثلاثة، وبعد السلامات والمباركات وتقديم الهدايا للمياء بدأ الاحتفال وكان عبارة عن تورتة كبيرة وعليها صورة لمياء، احتفال أشبه بعيد الميلاد ولكنه لنجاحها، وبعد طقوس التقطيع وتوزيع أجزاء منها على الموجودين ومشاركتهم معانا بالاحتفال قعدنا كلنا نتكلم وكان واضح الارتباك على كاميليا وأعتقد إننا كلنا



لاحظنا ده وبادرت مريم بالسؤال:

- مالك يا كاميليا؟ متوترة ليه؟ إسلام مضايقتك؟

ليرد إسلام سريعًا:

- والله ما عملتلها حاجة، هي كده من امبارح من وقت ما قررنا:

ليرد مصطفى:

- قررتوا إيه؟ ما تنطق يا بني قلقتنا.

- بصراحة أنا وكاميليا:

وهنا جن جنون مريم لاعتقادها بانفصالهما وبانفعال شديد:

- ما تنطق يا إسلام في إيه؟

- قررنا ميعاد خطوبتنا.

وفجأة تحولت تعابير الوجوه من الترقب والحزن إلى الفرحه العارمة والمباركات وجاءت لمياء أكثر من تهتم بالتفاصيل في حياتنا بالسؤال:

- امتى بقى عشان ألحق أجهزلكم المكان وده هدية مني ليكم؟

لتنطق كاميليا لأول مرة بعد أن زال توترها.

- آخر خميس في فبراير يوم ٢٣ إن شاء الله.

- يعني باقي ١٣ يوم، كويس جدًا إن شاء الله هعملكم حاجة تفرحكم.

وبعد المباركات والاتفاق على دور كل شخص بهذا الاحتفال بدأنا في الانصراف ووصلت البيت وكانت الساعة ٩ مساءً ومر باقي اليوم في سلام وأنا بتفرج على الصور الي تم التقاطها للاحتفال، وبعد فترة مش فاكركم قد إيه كنت نمت.

\*\*\*

- أنا قلققت وتوقعت فشل علاقة إسلام وكاميليا، وقبل ما تقول إنهم قرروا الخطوبة كنت جهزت في عقلي مجموعة من الاتهامات أوجهها لإسلام وإنه فشل في الحفاظ على كاميليا، ومع قرار الخطوبة انهارت كل الاتهامات وتحولت لحالة من السعادة والفرحة وكأنها خطوبتي أنا.

- إسلام وكاميليا الاتنين عندهم ٢٥ سنة، ممكن إسلام أكبر بكام شهر أو أيام معدودة مش فاكرك الحقيقة، وفي بعض الأحيان قُرب السن بيعمل مشاكل في عدم التفاهم بسبب إن العقلية بتكون

مقاربة جداً إلا إن إسلام وكاميليا أذكاء جداً في التعامل، كل واحد منهم مستمع جيد جداً وبيقدر يحدد مشاكله وبيقدر يصلحها، وأهم ميزة عندهم عدم التفرد بالرأي بيتقبلوا الآراء الأخرى، والحقيقة إنني قلقلت شوية إن ممكن يكون قرارهم الانفصال، لكن الي كان مطمئني توتر كاميليا؛ لأنها مش بتوصل للمرحلة دي غير في الفرح بس هي بتقدر تواجه حزنها وتكون قوية وجامدة وتكون قادرة على الصمود ومش بتتوتر؛ لأنها عارفة إن ده ممكن يضعف موقفها في الحاله دي عشان كده كنت مطمئن نوعاً ما إن القرار هيكون مفرح مش محزن.

- سؤال مهم بالنسبالي ممكن أسأله؟

- اتفضلي طبعاً.

- مريم كانت حالتها إيه؟

- أقوى وكأنها في تحدي ومصممة تكسبه وكأن حياتها متوقفة على الموضوع ده ومستعدة لأي حاجة وهادية ومشرقة والأمل باين في عنيتها.

- يعني أتوقع نجاحها في الوصول لقلب مصطفى؟

- ممكن.

- ممكن تكمل إيه الي حصل بعد كده؟  
- هحكيلك.

مرت الأيام بدون أي جديد، بعض المحاولات مني لتجديد الشغف في حياتي ووضع خطط واستراتيجيات للعبور بحياتي إلى بر الأمان والخروج من عنق الزجاجة، الحصول على الحرية أصعب سهل ممكن نوصله كلنا في الحياة، أحرار لكن الذكريات والماضي وخيبات الأمل والفشل بيهاجمونا من جميع الجهات وبيقيدونا، في الي بيستسلم وبيسيب نفسه للحياة وما بيحاولش يقاوم كل دُول، وفي الي بيقاوم ومصمم إنه يهرب لبر الأمان.

زمان قبل موت أبويا وأمي كانت الحياة بسيطة جدًا وسهلة جدًا، حضن الأم كان بيهون كل حاجة كان الأمان من العالم، الأم هي أقوى خط دفاع في حياتنا، والأب الي بيسند ووجوده بيدي قوة جبارة تخيلنا نستحمل ونحارب عشان نوصل لهدفنا، علاقتي بأهلي ما كانتش قوية لكن وجودهم في حياتي كان مصدر اطمئنان، في ناس ما بتعرفش تعبر عن حبها لأهاليها في ناس ما بتعرفش تطلبهم جنبهم، في ناس بتخاف من رد فعل أهاليهم وده مش معناه إنهم مش عارفين قيمة أهاليهم أو مش بيعبوهم بالعكس الناس دي أكثر ناس متعلقة بأهاليهم وبيستمدوا قوتهم منهم.

الخوف وحش كاسر يعطينا كثير وأوقات يدمرنا من جوانا  
وكمان يدمر علاقتنا بناس كثير حوالينا منهم الأهل والصحاب،  
بيخلينا نقبل بكل حاجة ناقصة على أمل إننا نعيش الأفضل منها في  
المستقبل ونفضل خافين إن الأفضل ما يحصلش، الأيام بتمر وأنا  
بحاول أكون أحسن، بحاول أتعرف على عقليات جديدة أنغمس  
مع أطيايف المجتمع أتعرف على العالم اللي حواليا سواء عن طريق  
الفيس بوك أو الندوات أو حضور مؤتمرات، عندي وقت فراغ  
كبير أعمل حاجات ما كنتش قادر أعملها وأتعلم حاجات أكثر،  
وبالرغم من كل ده إلا إني لسه مش لاقى إجابات على أي أسئلة  
من اللي جوايا مش عارف الأسئلة صعبة ولا الإجابات هي اللي  
صعبة ولا أنا بدور في الاتجاه الغلط؟ ما اعرفش، وعدى الأسبوع  
بدون أي جديد يُذكر، فراغ تام في حياتي بالرغم من محاولاتي،  
وبدأت أسبوع جديد بمكاملة صباحية من معاذ كانت يوم السبت  
١٨ فبراير ٢٠١٧.

- خير يا معاذ؟

- قررت أخطب فريدة.

- بالسرعة دي يا معاذ؟

- ليه لأ؟ فريدة طيبة جداً وحنينة وشايف إنها مُناسبة ليا، عقليتها وتحليلها للأمور وقادرة ترتب أولوياتها وعارفة هي عايزة إيه وبحبها وبحب ضحكتها، أنا معاك إن الفترة قصيرة لكن لقيت فيها كل حاجة محتاجها، فيها عيوب أكيد، كلنا فينا عيوب بس مش شايف إن عيوبها ممكن تمنعني، الناس الي بتقيس العلاقة بالوقت مش قادرين يشوفوا الي معاهم من جوا مش قادرين يحددوا هما مرتاحين ولا لأ، معندهم مش أي مميزات للقياس أقرب حل ليهم بيكون القياس بالوقت.

- عقليتك اتغيرت يا معاذ.

- الحياة من غير مخاطرة ملهاش طعم، وأنا طول عمري خايف من المخاطرة وبدور على الحلول المثالية والحياة المسالمة وبرده بخسر، حسبتها طالما خسارة بخسارة إيه المانع من المخاطرة، خسرت عادي مش أول مرة وأكيد هتعلم، كسبت يبقى خير كله خير.

- ودلوقتي كسبت ولا خسرت؟

- لسه بدري المغامرة لسه بتبدأ، بس أقدر أقول إني نجحت في التخلص من الشخصية الانهزامية الي كانت جوايا وبتمنى إنها ما ترجعش تاني.

- مبروك يا معاذ بتمنالكَ التوفيق.

انتهت المكالمة وأنا مبسوط من الي معاذ وصله، قدر يلاقي شريكة حياته الي بتمناها، اتخلص من حكمه السريع على الأشياء، هو مقدرش يعمل ده من أول مرة؛ اتهزم كثير لكنه قرر ما يتكلمش عن انهماه ويكمل ويحاول يقف على رجله وبمجرد ما قدر يواجه العالم ونفسه قبل أي حاجة قرر إنه يتكلم.

عدّى باقي اليوم وأنا جوايا طاقة إيجابية كبيرة ومسكت النوت بوك بتاعتي، وبدأت أكتب فيها، كتبت كثير عن كل حاجة في حياتي؛ أصدقائي وأهلي، كتبت عن نفسي حاجات كنت بتمناها فيا وكتبت أسئلة كثير بتدور في دماغي كتبت عن أحلامي وطفولتي كتبت عن مستقبلي الي بتمناه، كلها حاجات ما لهاش علاقة ببعض إلا إن أنا الي كتبتها وفي نهاية كتابتي كانت آخر جملة كتبتها:

{ لا يوجد وقت مناسب نحن من يجعل الوقت مناسب }

وقفلت النوت بوك وأنا بفكر في الجملة الأخيرة وافكرت إسلام وقراره بالاعتراف لكاميليا ومعاذ وفريدة، هو الوقت الي كان مُناسب فعلاً ولا هما الي جعلوا الوقت مُناسب، ولأول مرة الإجابة تكون واضحة بالشكل ده وإنهم هما الي جعلوا الوقت

مناسب، وبعد شوية وقت مش فاكر قد إيه كنت نمت.



- بالنسبة للأهل يمكن فجوة الزمن وتغير الأوضاع وظهور التكنولوجيا هما السبب سواء في حدوث ده أو في اكتشافنا في إنه موجود أصلاً، الفيس بوك أعطى لكل واحد الحرية في التعبير عن إحساسه ومشاركته للناس واكتشافه لأشخاص تانية بتواجه نفس الإحساس أو نفس المشكلة غير واقعنا الحقيقي بنخاف نعبّر عن مشاكلنا وعن إحساسنا لأسباب كتير منها نفهم غلط أو الاستخفاف بمشاكلنا، الأسباب كتير جداً عشان كده بمجرد دخولنا عالم السوشيال ميديا والعالم الافتراضي بنخلع كل الوشوش وبنعيش من غير خوف وبنتكلم بحرية.

- متفق معاكي بشكل كبير، وممكن كمان أسلوب التربية؛ زمان أهالينا اتربوا على أشياء مفتقدينها في عالنا الحالي، هما بيحاولوا يربونا عليها هما كان المرجع الأساسي بتاعهم المواقف والأهل، عالمهم كان مقتصر على أشياء بسيطة، مصادر التأثير على حياتهم كانت قليلة، أما الوضع الحالي في عصر التكنولوجيا المراجع كتير، الأهل مش هما مصدر التأثير الوحيد على حياتنا دلوقتي مش محتاجين وقت عشان الخبر ينتشر، أفكارنا بتتكون من المجتمع



المحيط بينا الي حجه بيكبر كل يوم بوجود التكنولوجيا، عندنا ثقافات كثير، بقينا مُطلعين على ثقافات البلاد المختلفة الي حوالينا، أعتقد إن ده سبب من أسباب التأثير على علاقتنا بأهالينا.

- فعلاً ده واقعنا الحالي، بالنسبة لمُعاذ أنا مبسوطه جداً إنه نجح في التغيير والمواجهة واختياره لشكل حياته الجديدة وبالرغم من اندهاشي حتى اللحظة بعلاقته بفريدة إلا إني اتبسطت إنه قرر يخطبها وخصوصاً إنه باين من كلامه إنه بيعجبها فعلاً وقادرين يتفاهموا.

- ده حقيقي، أكملك بقية الحدوته الي أوشكت على نهايتها وباقي لينا نص ساعة على القاهرة.

- اتفضل كمل.

وصلنا ليوم ٢٣ فبراير ٢٠١٧ يوم خطوبة إسلام وكاميليا كان يوم لطيف جداً وهادي وأحداثه كانت جميلة، الصبح كان مجموعة من التهاني والمباركات مصحوبة ببعض النكات والهزار على جروب الواتس آب وكل واحد بيجهز نفسه للمناسبة بطريقته الخاصة، ومر اليوم وصولاً للساعة ٥ مساءً وباقي حوالي ساعة أو أقل على الوقت المقرر للاحتفال، ولبست بدلة رصاصي على شوز

أسود.

وصلت المكان قبل الميعاد وكان الجميع موجود والساعة ٦ مساءً، بدأ الحفل برقصة بين العريس والعروسة، وبعد نهايتها الانقسام تم؛ أصحاب العريس في جهه والعروسة وأصحابها في الجهة الأخرى، ومرّ اليوم بسلاسة ولطف وكان يوم جميل وانتهى الاحتفال الساعة ٩ مساءً، وبدأ الحضور في الانصراف ولم يتبق سوى بعض الأهالي والأصدقاء، وكان في اتفاق مسبق بينا بإننا نعمل احتفال مُصغر بينا، وبدأنا في التحرك أنا ولياء مع بعض ومعاذ وفريدة ومصطفى ومريم وإسلام وكاميليا، وصلنا المكان وكانت كل حاجة جاهزة ولعبنا وهزنا وضحكنا وكان في بالي سؤال وقررت أسأله لكاميليا وإسلام:

- إيه إحساسكم وأنتو كنتوا أصحاب وتحولت العلاقة لجواز؟  
وكان رد إسلام:

- القرار صعب مش سهل إطلاقاً، جواك إحساسين عكس بعض الأول خايف تاخذ الخطوة تفشل تحسرها كصديقة، الثاني إنك مش قادر تمنع نفسك عن حبها ومراقبتك ليها وتركيزك معاها ولازم تاخذ الخطوة، الحب مغامرة كبيرة والمغامرة مع شخص

عارفك ممتعة جداً، في الأول كنت مرعوب من الملل وإننا عارفين عن بعض حاجات كثير، ومع الوقت لقيت إن المواقف اللي بينا وكلامنا القديم كأصدقاء وخروجاتنا وكل حاجة كانت سبب بيقوي العلاقة بينا، قررنا إننا نحول نقاط القوة في علاقة صداقتنا تكون هي أساس علاقة حبنا ونبني عليها وأعتقد إننا نجحنا.

- وأنتي ردك إيه يا كاميليا؟

- الرعب ده من أعلى مراحل الخوف، فشلت في علاقة وحب سنين، وبعد فترة قصيرة اعتراف من صديق ليا بحبه، اترعبت في الأول مش عايزة أخسر تاني وخصوصاً لو صديق ليا زي إسلام، وبالرغم من كده قلبي كان مطمئنه وعيونه كانت صادقة وقررت أخوض التجربة.

وبما إننا كنا أصدقاء ده سهل عليا أتكلم معاه بكل صراحة ووضوح وطلبت منه شوية وقت وبسبب علاقة صداقتنا قدر يطمني وفعلاً خدت وقتي ومع الوقت واكتشاف كل واحد فينا كل أجزاء حياة الشخص التاني العلاقة تحولت بكل سلاسة من صداقة لحب، الحياة لسه قدامنا نجحنا في أولى خطوات علاقتنا وهنواجه صعوبات كتير هتعدّي.

قبل ما أحاول أقول أي حاجة معاذ تكلم:

- بنسمع عن الحب قصص وبنسمع عن النصيب قصص وبنسمع عن القدر قصص وفي منها الحزين وفي منها الي انتهى نهاية سعيدة، الغريب في كل ده إن التلاتة مرتبطين ببعض في الفرح وفي الحزن بنفصلهم، يعني اتنين بيعبوا بعض واتجوزوا يتقال قدرهم حلو ونصيبيهم جمعهم عشان بيعبوا بعض، نفس الاتنين بيعبوا بعض وانفصلوا وانتهت قصتهم يتقال قدرهم كده نصيبيهم ما يتجمعوش مع إنهم بيعبوا بعض، وبواقع تجربتي البسيطة أقدر أقول إن الحب قرار يعني أنا كنت بقارن كل شوية بين اتنين على أمل اختيار المناسبة فيهم وفي الآخر تنتهي المقارنة بإن مفيش ولا واحدة مناسبة ليا، وفي الوقت الي قررت أفكر بعقلي وأرتب أفكاري لقيت الي بدور عليه موجود قدامي وأنا الي كنت مش عايز آخذ القرار. قبل علاقتي بفريدة كنت بتخانق معاها بمجرد دخولها المكتب، ما كنتش بستنى أسمع هي عايزة تقول إيه، وهي كانت متعلقة بشخص تاني جوا المكتب أظن كلكم عرفته دلوقتي وأنا كنت حاسس، وبعد ما عرفت إنها هي الشخص الي بدور عليه اكتشفت إن خناقي معاها كان غيرة وحب وفي الوقت ده قررت أعترف لها بحبي وحاليًا بنجهز لخطوبتنا.

بارك الجميع لمعاذ وفريدة وانتهى اليوم ووصلت لمياء لبيتها ورجعت البيت وغيرت هدومي وقعدت على السرير ومن الإرهاق نمت.

\*\*\*

- معاذ كان عارف إن فريدة معجبة بـيك؟
- بالظبط ومع ذلك ما كنش عائق قدامه؛ لأنه مفيش حاجة بيني وبين فريدة مجرد إعجاب وانتهى.
- وأنت متفق مع معاذ إن الحب قرار؟
- أعتقد إنه بالفعل كده، إسلام وكاميليا علاقتهم بدأت بقرار من إسلام وهو ما يعرفش إن مفيش حد في حياتها، وبالرغم من المشاكل الي ممكن تحصل بقراره ده إلا إنه ما تراجعش عن قراره، معاذ نفس الكلام أخذ القرار بالاعتراف بحبه لآخر شخص كنا نتوقع إن يكون في بينهم أي حاجة، وبالرغم من احتمالية عدم نجاحه إلا إنه ما تراجعش عن قراره، مريم بالرغم من صعوبة موقفها مع مصطفى إلا إنها مصممة وما تراجعتش عن قرارها، كل دي مواقف بتثبت نظرية معاذ، وفي مواقف تانية ممكن تثبت فشلها بس الأكيد إنه لازم ناخذ القرار بالاعتراف بالحب، لازم

ناخذ القرار بالتمسك رغم كل الظروف، لازم يكون عندنا قرار إننا نواجه ونحافظ على الحب ده، في النهاية مواجهة القدر والنصيب قرار.

- إيه اللي حصل بعد كده؟

يوم ١٦ مارس ٢٠١٧ كان يوم خميس...

- أنت ازاي قادر تحفظ الأيام بالتواريخ بالشكل ده؟

- الفترة دي كانت من أصعب فترات حياتي ومستحيل أنساها؛ لأنها ليها أثر كبير جدًا جوايا، ٤ شهور حياتي اتحولت فيهم، مريت بظروف صعبة كتير، عشت تفاصيل كتير، فرحت فيهم بأصدقاء عمري، كانت فترة مهمة ومؤثرة في حياتي عشان كده متذكر كل اللي حصل فيها وكأنه امبارح.

- تمام فهمتك كمل.

في اليوم ده مصطفى جالي البيت ودي من المرات القليلة اللي مصطفى بيزورني فيها، وبعد الترحيب قعدنا واتكلمنا:

- المفروض إن أنا كنت جاي أنا ولمياء، بس أنا حبيت أتكلم أنا وأنت لوحدنا شوية قبل ما هي تيجي.

- أنت وليماء خير في إيه؟

- مش قادر أتأقلم على الوحدة، مش عارف أعيش لوحدي  
مش عارف أركز في حاجة مشاعري متلغبطة، حاسس إن الدنيا  
واقفة وإني على حافة الهاوية، تفتكر أنا محتاج دكتور نفسي؟

- الإجابة في كلامك يا مصطفى، أنت محتاج شخص جنبك،  
وأظن إنك عارف الشخص ده ومصمم تتجاهله، مصمم توجعه.

- أنا خايف أجرحها وهي متستاهلش ده، مريم بتحاول بكل  
طاقتها تكون جنبي بتحاول تعوضني عن كل اللي خسرتة، مريم  
بتحبني بجد وأنا عارف ومتأكد إنها هتكون سند ليا في الفترة دي،  
بس خايف من نفسي عليها خايف أخسرها، فاهمني؟

- فاهمك يا مصطفى، ومريم عاقلة وهتعرف تتعامل كويس مع  
حالتك وفاهمة أنت بتمر بإيه وعلى استعداد تستحمل لحد ما تكون  
أقوى وتبقى ليها، خد فرصتك ووقتك معاها؛ لأنك لو معملتش  
كده هتخسرها فعلاً كصديقة وكحبيبة.

وبعد دقايق وصلت ليماء وقعدنا واتكلمنا في حاجات كتير تخص  
حياتنا وشغلنا ومستقبلنا وعلى الساعة ٦ مساءً استأذنوا ومشوا،  
ومرّ اليوم ما بين القراءة وكتابة بعض الأشياء في النوت بوك، وبعد

شوية وقت من الكتابة والتفكير في اللي مصطفى وصلوا وخوفه من نفسه على اللي حواليه وازاي الخذلان ممكن يوصل الشخص للمرحلة دي، وبعد شوية تفكير كنت نمت.

\*\*\*

- أنا توقعت إنك لما تاخذ الأجازة الأحداث هتكون كثير لكن حصل العكس ليه؟

- ببساطة أنا قررت آخذ أجازة لإيجاد إجابة على أسئلتى، ومع محاولاتي لإيجاد الإجابات إلا إنها كلها كانت نتيجتها الفشل وبالتالى مفيش أحداث بتحصل في حياتي جديدة غير بعض المكالمات وحضور مؤتمرات وندوات بعض الأصدقاء ضمن محاولاتي لإيجاد الإجابات والنتيجة النهائية هي الفشل.

- وإيه نتيجة مناقشتك مع مصطفى؟

- قرر يدي لنفسه الفرصة ويخوض التجربة مع مريم، حاول يتغلب على خوفه وحاليًا هما لسه في بداية علاقتهم وبتمنى إنهم ينجحوا؛ لأن الاثنين يستاهلوا كل خير.

- ربنا يوفقهم، بس لحد دلوقتي مش فاهمة أنت كنت في إسكندرية ليه؟



- ده آخر جزء في الحدوتة.

الأيام بتمر كلها شبه بعض لا جديد يذكر ولا قديم يعاد وينتهي شهر مارس بسلام وأمان ونوصل لشهر أبريل، إسلام وكاميليا بدأو دوّامه التجهيز للفرح ، ومعاذ وفريدة يبجھزوا لخطوبتهم في أواخر شهر أبريل، مريم ومصطفى بيحاولوا مع بعض، ولمياء مشغولة بتحضيرات أول فيلم طويل من إخراجها بعد النجاحات الكبيرة الي قدرت تحققها في مجال الأفلام القصيرة، وصولاً إلى يوم الثلاثاء ١١ أبريل ٢٠١٧.

- ده امبارح؟

- بالظبط.

وكالعادة صحيت من النوم مفيش أي حاجة أعملها سوى التفكير في الإجابات الي محتاجها، هي الشغل الشاغل ليا على مدار أكثر من ٣ شهور كاملين، محتاج إجابة: أنا ليه حياتي واقفة؟ ليه ما بحاولش؟ ليه حياتي بقت روتينية؟ يومياً بسأل نفس الأسئلة وما بوصلش لحاجة، والغريب هو إحساسي في الفترة دي وهو شعور " اللاشيء "؛ مش فرحان ولا حزين بس مرتاح، وأثناء تصفحي للفيس بوك ظهر بوست قديم لصديق ليا في إسكندرية

وافتكرت أيام سفري لإسكندرية والذكريات الي موجودة هناك، وحاجة جوايا قررت إن أسافر إسكندرية لوحدي وفي القطر ده وفي الوقت المعين ده وبالفعل حجزت تذكرة لإسكندرية تاني يوم وعدى اليوم وأنا متحمس جداً للسفر واسترجاع ولو بعض من الذكريات القديمة وأحداث أي تغيير ولو بسيط في حياتي وعلى الساعة ١٠ مساءً كنت نمت.

وصحيت النهارده الصبح لبست ونزلت ركبت تاكسي لمحطة مصر وركبت القطر، وبعد ٣ ساعات وصلت الإسكندرية، ووقفت قدام البحر وأنا بفكر إن أنا هنا لوحدي لأول مرة، كنت فاكِر إن أنا هشتاق لقعدة الصحاب والذكريات والماضي بكل تفاصيله إلا إن توقعاتي كانت في غير محلها، شعور " اللاشيء " وزاد عليه أكثر إن أنا بطلت أفكر وده كان شعور غريب ومريب، واستغربت نفسي جداً.

صعب أكون شخص ما يبطلش تفكير وفجأة عقلي يتوقف عن التفكير وكأنه وجد مبتغاه، وبعد ٥ ساعات من المشي والقعدة قدام البحر قررت أرجع وركبت تاكسي مع راجل كبير وقالي جملة أعتقد إنها هي الإجابة على كل أسئلتي؛ " الراحة ما بيوصلش ليها غير شخص تعب واجتهد وعمل الي عليه ورضي بالي ربنا كتبهوله،

والراحة دي هدية ربنا لي".

ووصلت المحطة وركبت القطر وأنا وأنتي قاعدين مع بعض  
حاليًا، وبكده تنتهي رحلة آخر ٤ شهور في حياتي، ودلوقتي عرفت  
ليه أنا هنا لوحدي وفي الوقت ده بالذات.

\*\*\*

"القطار رقم ٩٣٠ القادم من الإسكندرية متجهًا إلى رصيف  
نمرة ٣"

- يعني لقيت إجابة على أسئلتك؟

- الإجابة ما كنتش كلام، كانت شخص هو أنتي، موافقة  
تغامري .

- بالرغم من إنها متأخرة ٧ سنين كاملين، إلا إني جاهزة  
للمغامرة.

تمت بحمد الله

٢ ديسمبر ٢٠١٩

٤ سبتمبر ٢٠٢٢

## شكرو واجب لـ

" صحابي "

شكرا على دعمكم وعلى وقفتمكم جنبي، وفي منكم الي تعبت  
معايا في الكتاب ده، وفي الي تعبت بأسلتي عن مواقف معينة.  
شكراً لـ " فتیان - بودي - محمد إبراهيم - منشاوي - أحمد صلاح  
- إسلام جمال - طارق - محمد علي "؛ الناس دي مفيش كلمة شكر  
تقدر توفيهم حقهم.

" نونتي - منة "

شكر وإهداء و ورد وكل حاجة حلوة في الدنيا لصديقتي  
الصدوقة، يمكن أكثر واحدة تعبت معايا على مدار سنتين  
متواصلتين عشان أعمل الكتاب ده، واستحملت حاجات كثير،  
شكرا جدا وأنا ممتن ليكي جداً.

" سارة - جهاد وجهاد "

شكرا لوجودكم وتعبدكم معايا، وبتمنى ليكم السعادة والفرحة

في حياتكم القادمة وتكون مليانة نجاحات وتوصلوا الي بتمنوه.